

宋

史

卷二十六

T2455/17

卅五

6

356

CHINESE JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE
SEP 20 1932

CHL 2455,17



CM 0	1	2	3	4	5	6	7	8	9	10	11	12	13	14	15	16	17
Lab D50 2	95/0/2	81/0/0	66/0/0	51/0/1	35/0/0	20/0/0	29/19/54	55/39/33	42/57/29	82/4/79	51/50/13	50/28/29					
	38/14/16	66/16/18	50/5/22	43/14/21	55/9/25	71/32/0	62/34/60	40/9/43	52/48/17	31/21/21	72/23/57	73/19/68					

Harvard College Library Imaging Services <http://imaging.harvard.edu>

必簡錄卷一百七十

明刑部員外郎仁

和弘齋外經邦學



皇清翰林院侍講學士四世孫遠平校閱

廢官 宋六之十五

汪綱 王寔 余玠 向士璧 冷應激

杜杲 子慶 王登 楊揆 胡穎 兄顯 王邁

史彌鞏 黃螢 楊大異 趙逢龍 孫子秀

李曾伯 陳墀 羅必元

汪綱字仲舉黟縣人曾祖勃簽書樞密院父義和侍御史主管

佑神觀綱初以祖蔭入官復中湖南漕試調鎮江司戶叅軍馬

大同領鎮強毅自任綱言論獨不詭隨朝議慮銅寶洩於外欲

行兩淮鐵錢於沿江邊面而私鑄盛行錢輕物重綱言若官不

求餘羨重禁以戢私鑄則民將自便之何至以敝內郡耶大同
悟擢桂陽軍平陽縣令縣連溪峒蠻蠻與居綱一遇以恩信歲
饑旁邑惡少千餘入境疆貸挾界頭牛橋二砦兵爲援砦盤踞
萬山間前令未嘗涉其境綱親造之蠻不虞其至相率出迎綱
夜宿砦中呼砦官詰責不能防守狀皆皇恐伏罪杖其首惡八
人發粟振糴民賴以安桂陽歲貢銀平陽當三分之二綱謂故
時銀礦全發可以應命令地寶已竭力請蠲免從之改知弋陽
父喪服除知蘭溪決擿如神歲旱郡倚辦勸分綱言勸分所以
助義倉若一切行之非所謂安富恤貧也願假常平糴本始得
循環迭濟又勸富民浚築塘堰大興水利使餓者得食其力全
活甚衆郡守張抑列爲荒政之冠繼知太平懼內艱擢監行在
左藏西庫議當遣幣于金屬金人殺其主允濟自立遣使來告

襲位綱言當止之境上論以爾前主所增歲幣今旣易代當復
隆興大定之舊俟此議定其正且生辰之使可遲歲月吾得以
擇邊將葺城堡簡軍實儲糗糧使沿邊屹然有不可犯之勢聽
其自相攻擊然後以全力制其後廟堂趨之擢提轄東西庫幹
辦諸司審計司選知高郵軍陞辭言揚楚二州當各屯二萬人
壯其聲勢而以高郵爲家高郵三面阻水湖澤奧阻戎馬所不
能騁獨西南一路直拒天長無險可守去城六十里隨宜經畫
或浚溝塹或設伏兵以扼其衝若慮湖可以通淮當招水卒五
千造百艘列三砦以戒非常上是之興化民田濱海昔人築堰
以障易鹵置石函以疏運河水勢歲久皆壞綱至亟爲增修部
使者聞于朝增秩提舉淮東常平綱上言兩淮之積不可多昇
潤之積不可少淮米越江有禁乃自分畛域豈爲民父母之意

請下金陵糴三十萬以便淮西之民京東糴五十萬以便淮東之民平江積米久而紅腐宜取餉輦下諸軍江上歲運當至京者貯之京口金陵轉漕兩淮中都諸倉亦當廣糴以補其數制置使訪以備禦言淮地自昔號財賦淵藪西有鐵冶東富魚稻足以自給淮右多山淮左多水足以自固誠能合兩淮爲一家兵財通融聲勢合一雖不假江浙之力可也州郡禁兵本非供役乃就糧外郡耳今不用之戰鬪使共力役緩急戍守專倚大軍指日待更不安風土若主兵生長邊地墳墓室家人自爲守當精擇伉壯廣其尺籍悉隸御前軍額分擘券給以助州郡衣糧之供大率如山陽武鋒軍制則邊面不必抽江上之戍江上不必出禁闈之師生券更番勞費俱息時有獻言制司買墾荒土置營田綱言地不難辦而工力水利非久不可曷若勸民盡

耕閒田明滄堙塞官爲之助變瘠爲沃使民有餘蓄則晁錯入粟之議本朝便糴之法在其中矣制司知其無益乃止淮東煮鹽之利歲久敝滋綱悉爲挾搯凡虛額無實詭爲出內飛走移易事制曲防課乃更羨旣盡償所負百餘萬尚贏三十萬爲椿辦庫以備鹽木之闕添新竈五十所諸場一視乾道舊額課官吏殿最增場官俸以養其廉擢戶部員外郎總領淮東軍馬財賦時邊面多生券山東增歸附月糧真楚諸州又新招弩手皆仰給總所諸州漕運不以時至綱爲核名實警稽慢區畫處分餉賴以不乏累遷直煥章閣知紹興府主管浙東安撫司公事開蕭山古運河西通錢塘東達台明創江口師使外淤弗入內水不出仍甃其塗以達于城闈諸暨十六鄉瀕湖蕩濼爲豪勢私占水不得洩旱不得溉綱疏請於朝力清隱占湖田始復又

言越郡控臨海道拱衛都畿而軍籍單弱乃招水軍刺義手創
營增甲威勢赫然兼權司農卿尋直龍圖閣理宗進右文集英
二殿修撰寶謨閣待制凡佩四印文牘山積而能操約御煩治
事不過二十刻公庭如水甲官下吏一言中理慨然從之寶慶
三年大水發粟蠲租奏罷經總制窠名虛額困瘠頓蘇入見言
臣下先利之心過於徇義爲身之計過於謀國媮惰退縮奔競
貪黷相與爲欺宜有以轉移之尋權戶部侍郎致仕卒越人相
率慟哭生平刻意問學博通經史至兵農醫卜陰陽律曆諸書
靡不研究機神明銳遇事立決爲文尤長於論事援據古今辨
博雄勁服用不喜奢麗供帳車乘雖敝不更所著有恕齋集左
帑志漫存錄

王寔字定叟東陽人大父豪以誅方臘功補官寔少有奇氣嘉

定四年試武舉中絕倫異等喬行簡喜曰爲朝廷得一將才矣
授承節郎爲鄂帥鍾興嗣隨軍都錢糧官尋守禦黃州制置使
李璠辟致幕下於軍事知無不言謂招募良家子不可以資緣
冒濫防守江而全賴正軍若義勇民兵特可爲聲援耳今羸病
者多兵械損舊豈不敗事調兵防江當於江岸創屋居之使專
心守禦又言宐立部伍法平居則稽其虛籍冒請之敝糾其竄
逸生事之人緩急則作其併力向敵之志誓其逃陣不進之心
蓋用兵不視人數之多寡而視教習之精否則勝負之形可見
矣理宗卽位差克浙西副都監湖州駐劄值潘甫事方定因綏
撫之鎮江都統趙勝辟爲計議官時李全寇亂勝出戍揚州屬
官多憚從行寔慨然曰此豈臣子辭難之日至揚子橋聞賊兵
在南門竟赴之身先士卒大小十八戰無一不利奪賊壕築土

城焚城門賊氣爲懾差知應州兼沿邊都巡檢使節制黃蒲後
營彈壓諸道軍馬諸道兵二十萬將往收復楚州霆帥所部爲
犄角之助薦試閤門舍人入對言恢復之說有二曰規撫曰機
會顧今之規撫安在哉守令所以牧民而惠養之未加將帥所
以御軍而拊循之未至邦財未裕而楮券之敝寢深軍儲未豐
而和糴之害徒慘官有土地而荒蕪民因賦役而破蕩獄訟類
成冤抑銓曹率多淹留薦舉無反坐貪徒得以引類而通班按
刺不徇公微官易以迂意而連譴以言郡計則紛耗於囊橐苞
苴以言戰功則多私於親昵故舊至於降卒中處養虎遺患輕
敵開邊以肉餒虎夫以規撫之切要者而不滿人意如此臣敢
輕進恢復之說以爲得乘機會哉凡臣之所陳者乞播告中外
悉懲其舊而圖其新規撫旣立然後義旗一麾諸道竝進臣力

尚壯願效前驅惟陛下堅定而勉圖之帝稱其言可采陞武功
大夫出知濠州賜金帶至州節浮費糴粟買馬以備不虞特轉
橫班諸使北兵至浮光其民奔遁相屬朝議以霆移知光州兼
沿邊都巡檢使霆冒雪夜行倍道疾馳至州分遣間探整飭戰
守之具大戰於謝令橋光人以安督府魏了翁致書慰安以緡
錢十萬勞其軍求去除吉州刺史仍知光州固辭丞相鄭清之
制使史嵩之皆以書留霆霆不從曰士大夫當以世從道不可
以道從世再授閤門舍人達州刺史右屯衛大將軍兼知蘄州
亦不赴遷淮西馬步軍副總管兼遊擊軍副都統論遊擊軍
十事不報奉崇禧觀祠起知高郵軍流民弟邦傑聚衆爲盜霆
殲其渠魁餘黨悉散時議出師諸軍畢行霆言莫若遣間探覘
敵情如不得已然後行之否則無故自蕩其根本是外兵未至

而內兵先慘烈也。雖大與時迂而境內獨安。讒者益衆。復奉雲臺觀祠。賈似道欲移之齊安。寔謂防秋已急。邊守不宜臨時更易。盍少需之。乃授帶行左領軍衛大將軍。克沿江制置司計議官。撰沿江邊誌一編。以獻制使董槐。鄧泳交薦。差知壽昌軍。改蘄州建學舍祠忠臣。貽書丞相杜範曰。兩淮藩籬也。大江門戶也。三輔堂奧也。藩籬不固。則門戶且危。門戶既危。則堂奧豈能久安乎。乞瞰江審察形勢。置三新城。蘄春置于龍眼磯。安慶置于孟城淝陽。置于宣化。不報。卒生平處宗族有恩。其父析業。獨以讓其兄。嘗訓子弟曰。窮理盡性。學之本也。有玉溪集行世。余玠字義夫。蘄州人。父子才見李全。傳玠家貧落魄。喜功名。好大言。嘗爲白鹿洞諸生。毆茶肆翁。死脫身走襄淮。作長短句。謁制使趙葵。葵壯之。留幕中。未幾以功補進義副尉。克制司參議。

官進工部郎官。嘉熙三年。率舟師渡淮入河。抵汴。與元兵戰於汴城河陰。所向有功。進三秩。歷遷華文閣待制。節制昭信軍。賜金帶。淳祐元年。提兵解安豐。闔拜大理少卿。知潭州。累淮東制置副使。進對欲使國人上下所行無不確實。然後華夏率乎天人感格。今世胄之彥。塲屋之士。田里之豪。一或卽戎卽指。爲羸人。斥爲噲伍。願陛下視文武之士。爲一勿令偏有所重。帝曰。卿人物議論。皆不尋常。可獨當一面。真拜兵部侍郎。徽猷閣學士。四川宣諭使。給金字符黃榜各十。以備招撫。玠作經理四圖。深自許可。願假十年。當手摯全蜀。以還于朝。然後歸。老臣之願也。尋進龍圖閣。四川安撫制置使。知重慶府。兼四川總領夔路轉運使。蜀自寶慶至淳祐十六年間。凡授宣撫三人。制置九人。或老憊貪庸。而不久。或慘酷繆戾。遙領而不專。或開隙而無成績。

東西兩川。無復紀律。遺民咸不聊生。監司戎帥。各專號令。擅辟守宰。政事日壞。自玠之入。人心粗定。始有安土之志。乃大更弊政。遴選守宰。築招賢館于府之左。供張一如帥所。下令當如諸葛集衆思。廣忠益。欲有謀以告我者。近則徑詣公府。遠則自言于郡所在。以禮遣之。高爵重賞。朝廷不吝。以報有功豪傑之士。趣期立事。今其時矣。士之至者。玠不厭禮接。咸得其歡心。言有可用。隨其才任之。苟不可用。亦厚遺以謝。時播州冉氏兄弟。璉弟璞。自言有文武才。隱居蠻中。前後辟召。皆不應。及是聞玠賢。相謂曰。是可與語者。詣府上謁。玠素聞其名。引入。分廷抗禮。賓館之奉。安之若素有。居數月。無所言。玠爲設宴。酒酣。坐客紛然競言所長。璉兄弟飲食而已。玠以微言挑之。卒默然。玠曰。是觀我所以待之。何如耳。明日。關鼎館以處。且使人窺其所爲。兄弟終

日不言。惟對踞。以堊畫地。爲山川城郭之形。起卽漫去。如是又旬日。請見屏人。語曰。某兄弟辱明公禮遇。思以少裨。非敢同衆人也。爲西蜀計。其在徙合州城乎。玠不覺躍起。執其手曰。此玠志也。但未得其所耳。曰。蜀口形勝之地。莫若釣魚山。請徙諸此。若任得其人。積粟守之。賢於十萬師遠矣。巴蜀不足守也。玠大喜曰。玠固疑先生非淺士。今豈敢掠美歸已。當聞於朝。請不次官之。詔進玠端明殿學士。除璉承事郎。權發遣合州璞承務郎。權通判州事。徙城之務。悉以委之。命下一府皆喧以爲不可。玠怒曰。城成則蜀賴以安。不成玠獨坐之。無預諸君。卒築青居大獲。釣魚雲頂。天生凡十餘城。皆以山爲壘。幕布星分。爲諸郡治所。屯兵聚糧。爲必守計。因誅潰將。以肅軍令。移金戎於大獲。以護蜀口。移沔戎於青居。興戎先駐合州舊城。移守釣魚。以備內

水移利戎於雲頂以備外水諸城如臂使指氣勢連絡十年冬
率諸將巡邊直擣興元與元兵大戰十三年又大戰皆敗之利
司都統王夔素殘悍號王夜叉恃功驕桀不受節度所至劫掠
每得富家脅取金帛穴箕加頸四面然箕謂之慕蝕月以弓弦
繫鼻下高懸於格謂之錯繫喉縛人兩股以木交壓謂之乾榨
油蜀人苦之朝廷遠莫能詰且悉歛部將俸馬自入將戰則高
價估之大帥處分少不賺意百計撓之使不得有所爲及是迎
玠于嘉定所部羸弱纔二百餘玠曰久聞都統兵精今不稱所
望對曰夔兵非不精所以不敢見者恐驚從人耳項之班聲如
雷江水如沸聲止圓陣卽合旗幟精明器械森列沙上之人彌
望若林無敢亂行者舟中皆戰掉失色玠自若徐命吏班賞有
差夔退謂人曰儒流中乃有此人玠欲誅夔恐其握兵居外輕

動危蜀謀於親將楊成成曰前時大帥夔皆勢出其右今視侍
郎文臣心不肯甘心從令縱捨弗誅養成其勢後一舉足西蜀
危矣玠曰獨患其黨與衆未發耳成曰侍郎以夔孰與吳氏今
夔無吳氏之功而有曦之逆心恃豨突之勇敢慢法度縱兵殘
民奴視同列欲誅之一夫力耳待其發而取之難矣玠意遂決
夜召夔計事潛以成代領其衆夔纔離營成已單騎而入將士
皆愕眙相顧不知所爲成曉以帥指遂相率拜賀夔至斬之併
察其同惡數人稍稍以法誅之乃薦成爲文州刺史加玠資政
殿恩例如執政統制姚世安常疑玠圖已厚結丞相謝方叔子
姪方叔倡言玠失利戎心恐旦夕有變會玠欲革軍中舉代之
弊乃帥三千騎至雲頂山下遣都統金某往代世安世安閉關
不納密求玠短託方叔陳於帝前玠聞鬱鬱不樂寶祐元年聞

有名命愈不自安一夕暴下卒帝輟朝贈五官蜀人莫不悲慕如失父母玠自歷官大小三十六戰俱有勞効任都統張實治軍旅安撫王惟忠治財賦監簿朱文炳接賓客皆有常度至於修學養士輕徭以寬民力薄征以通商賈屬嘉定俞典開屯田于成都蜀既富實奏罷京湖之餉邊關無警又撤東南之戍屈指近來開闢未有能及之者惜其遽以太平自詫進蜀錦蜀箋過於文飾久假便宜之權不顧嫌疑昧於勇退遂來讒賊之口又所置機捕官雖足以廉得事情然虛實相半故人多懷疑懼卒至威名頓挫齋志以沒二年侍御史吳燧等論其七罪詔削奪原職仍簿錄家貲以犒軍贍邊六年復之子師忠以蔭入官歷大理寺丞徵所認錢三十萬削官勒停爲賈似道所殺

向士璧字君玉常州人負才精悍尚氣自好登紹定進士通判

平江爲淮西制置司叅議官以言罷起知高郵累遷至湖北安撫副使知峽州兼歸峽施黔南平紹慶六郡鎮撫使歷太府少卿大理卿寶祐六年北兵渡馬湖入蜀取資簡二州合州告急制使馬光祖命士璧赴援不待朝命進師數立奇功且捐家貲以供軍費帝嘉其志進秘閣修撰樞密副都承旨開慶元年涪州危又命往援北兵夾江爲營長數十里阻舟師不能進宣撫賈似道進駐峽州檄士璧以軍事付呂文德士璧不從乃以計斷浮橋奏捷具言方畧未幾文德亦以捷聞士璧還峽方懷傾奪之疑尋辟爲撫司叅議再遷湖南制置副使元將兀良哈解兵自交趾北還前鋒至城下攻圍甚急士璧極力守禦聞後隊且至遣王輔佑率五百人往覘以易正大監其軍遇於南岳市一戰有功潭州圍遂解上功賜金帶進兵部侍郎兼轉運使似

道疾其功諷御史陳寅孫附鳳劾罷之漳州居住又稽守城時所用金穀逮至行部責償幕屬方元善極意逢迎似道意士璧坐是死復拘徵其妻妾其後元善改知吉水歸得狂疾嘗呼士璧時輔佑亦死謫所德祐元年以太府卿柳岳言詔復元官仍還恩數錄用子孫立廟潭州

冷應澂字公定分寧人登寶慶進士調廬陵簿以廉能著揚長孺識拔之轉靜江府司錄叅軍治獄平恕范應鈴薦知萬載縣大修學舍招俊秀治其業旌通經飭行者以勸歲饑下令收養棄孩父母不得復問全活甚衆葉夢得列其行事風厲餘邑後通判道州入監行在權貨務遷登聞檢院景定元年知德慶府前守縱豪吏漁獵激變峒獠徧城六十里而營應澂未及入境馳檄諭之曰汝等不獲已至此新太守且上轉禍爲福此一機

也宜早計去就不然不免獠感悟然惑於謀主不能自歸應澂知其勢解卽厲士馬出不意一鼓擒之餘縱遣歸農極力摩撫愈爲簡便屬縣諉道阻租賦不至應澂爲之期曰首輸者與減分未至則償所減民惟恐後不一月訖事凡諸綱廩稍軍券前守積不得者悉補還之上下欣附復奏罷抑配鹽法用楮券折銀綱等五事以紓民力經畧雷宜中歎服亟上其事薦可大用詔陞本道提舉常平兼轉運使俾行其說劾守令貪橫不法十餘人列郡肅然最聞加直秘閣叅政陳宗禮舉以代已經畧就除直寶章閣知廣州主管廣南東路經畧安撫司公事馬步軍都總管領漕庾如故五司叢劇應澂分時理務不擾不劾毋以陶士行卜望之爲師治官事如家事惜官物如已物常曰方今國計內虛邊聲外震吾等受土厚恩安得清談自高以誤當世

白聞襄樊受圍日繕器械裕財粟以備倉卒後卒賴其用屢平
大寇未嘗輕殺笞杖以降亦加審慎至其臨事輒斷雖勢要不
爲撓奪後卒于家

杜杲字子昕邵武人父頴江西提刑杲以蔭授海門買納鹽塲
福建提刑陳彭壽檄攝閩縣尉江淮制置李珣羅致幕下滁州
受兵檄杲提偏師往援甫至民蔽野求入避守固拒杲啓鑰納
之金兵圍城數重杲登陴奮厲卒全其城調江山丞兩浙轉運
朱在辟監崇明鎮與總領岳珂議不合淮西制置曾武中復辟
廬州節度推官浮光兵變杲單騎往誅其渠魁反所餘金幣安
豐守告戍將將爲變帥欲致討杲謂必有所激請單騎從兩卒
往呼其將諭曰而果無他可持吾書詣制府將即日行一軍
然改知六安定遠淮帥李衍舉爲所蒞州縣之最擢知濠州制

使趙善湘密訪謀復盱眙杲曰賊恃外援富斷盱眙橋梁以困
之卒用其策李全衆數萬駐榆林阜請降杲計納之則有後患
諭而遣之名奏事主管官告院遷淮西運判詔問守禦策惟杲
力諫出師謂沿淮旱蝗不任征役中原赤土無糧可因若虛內
事外移南實北腹心之地必有可慮未幾兵潰衆服其先見命
知安豐軍元兵圍城與大戰明年又戰擢將作監御書慰勉用
李宗勉徐榮叟薦進太府卿淮西制置安撫副使兼轉運使累
以戰功加直學士嘉熙二年九月察罕圍廬州力禦敗之引歸
詔加兵部侍郎淮西制置使淳祐元年請老權工部尚書奉祠
理宗起知太平州擢華文閣學士沿江制置使知建康罷楊林
堡以其兵護溧陽淮民之寓沙上者謁程顥祠設張弼像置貢
士莊蠲民租二萬八千復與元兵戰于真州進敷文閣學士再

遷至吏部尚書杲隨資格務通其礙銓綜為清又言梁成大得罪名教廢銅子孫無得銓試歷寶文閣學士致仕進龍圖閣卒贈開府生平淹貫多能為文麗密清嚴善行草急就章晚歲專意理學嘗言吾兵間無悖謀左畫得力於四書為多子庶字康侯幼倜儻有大志性剛勁通宋典故善為文從父兵間習邊事以恩補官元兵圍安豐兵將不相下庶調護得其歡心遂協力捍禦辟淮西機宜文字廬州圍解命自事廟堂遷籍田令監呂文德聶斌軍與元兵戰朱臯白冢遷將作監簿通判和州權知真州郡素缺備廢大修守具積排杉木殆十萬株差知興化軍奉祠起赴淮東制司幕過闕遷將作監司農二丞差知和州昨辭言天時地利人和當審所尚苟恃天幸恃長江恃清野而付邊事於素不諳歷之人未見其可帝嘉納至則浚城濠增守

備修學宮治績甚多移真州歷淮東西提點刑獄兼廬州安撫副使進直秘閣人歡迎如見慈父就加刑部郎中主管安撫司公事兼知廬州與元兵戰于望仙白沙城收直華文閣開慶初累遷至兩淮制置使知揚州射陽湖饑民嘯聚遣將招刺得丁壯萬餘戮首惡數人京師火抗章自劾召赴行在尋直寶文閣知隆興府終江西運副

壬登字景宋德安人少讀書喜古兵法慷慨有大志不事生產出孟珙幕府久之權知巴東獻俘制司登自以書生不屈竟棄功去淳祐四年舉進士調興山主簿總領賈似道檄修江陵城條畫有法制使李曾伯經理襄陽登在行以功陞將作監丞丁母憂去及吳淵復至邊事甚亟因憶登才畧具書幣招之登拜家廟而行盡發其家牛犒師至軍淵亟呼諸將共議眾歡躍曰

景宋在此淵問汝輩欲出西門景宋欲從方城如何衆曰惟命時未有主者登患用兵不一請五大帥中擇一人爲節制淵卽書銀牌曰監丞代某親行將士用命與否賞罰畢具申登至沙市椎牛醢酒得七千人誓曰登與諸將義同骨肉今日之事登不用命諸將共殺登以獻主帥諸將有不用命制劊具在登不敢私衆股慄聽命竟立奇功於沮河趙葵相見握手曰景宋一身俱膽惜相見晚也俾叅宣撫司兼京西兩節馬祖辟克叅謀官遷軍器少監京西提點刑獄以督襄陽戰功登直秘閣聲日振有余思忠讒於光祖出登屯郢州侍御史慶珂劾思忠其黨過元龍沈翥在幕中又傾之以是議論不合才畧不能施識者惜焉開慶元年登提兵援蜀約日合戰夜分經理軍事忽絕倒五臟出血幕客唐舜申至尚瞪目視几上文書俄卒事

聞朝議以登功雖未遠實忠而歿特贈五萬其子他日申舟經漢陽有呼其名者三左右曰景宋聲也定之亦暴卒楊揆字純父臨川人少能詞賦以薦入瀕闕杜杲等揆始習射夜以青布籍地乘生馬以躍初過三尺次五尺至一丈數閃跌不顧久而閑熟杜杲賞其風神曰它日不在我下治法征謀多咨之逾年安豐被兵揆慨然請行以奇策解圍奏補七官制使孟珙辟于幕珙嘗燕客有將校語不遜命斬之從容諫曰斬之誠是第方會客廣謀議恐非其時且非其地珙大服旣而費本領錢數萬總領賈似道稽數責償珙出白金六百爲揆償揆又散之賓客酣歌不顧似道怒欲殺之揆曰漢高祖以黃金四萬斤付陳平不問出入公乃顧此區區不以結豪傑心耶似道始寘之揆謝絕賓客復治進士業遂登第調麻城尉向土壁守

黃州檄入幕尋以戰功調潭州節度推官遠得心疾趙葵爲京湖制置使檄與偕行王登迂於沙市劇談至夜分揆退曰王景宋才甚大惜欠沉細爾如揆副之何事不可爲但恐終以勇敗人以爲知言卒贈架閣

胡穎字叔獻湘潭人家世業儒父璵娶趙方弟雍女生二子長曰顯拳勇絕人以材武爲官方在襄陽每出師命顯與葵各領精銳分道赴戰摧堅陷陣聚散離合前無勁敵以功至檢校太尉穎自幼風神秀異機警不常諸舅以其類已每加賞鑒成童卽能背誦諸經中童子科復從顯學弓馬母不許遂感勵苦學尤長於春秋紹定三年范討李全檄穎入幕常夜三鼓後令檢服行諸營察衆志歸嚮全敗遣部所獲酋二十人獻俘于朝以賞補官五年復登進士授京秩歷官知平江府兼浙西提點刑

獄帝父榮王府十二人行劫穎悉斬之一日輪對理宗語曰聞卿好殺對曰臣非嗜殺不敢屈太祖之法以負陛下帝爲默然久之移湖南提舉常平作來諭堂奉母居之尋爲樞密都承旨廣東經畧安撫使湖州僧寺有大蛇能驚動人前後仕者皆籍奉穎獨殺之毀其寺移節廣西兼計度轉運使知靜江府請祠未幾遷京湖總領財賦咸淳間卒贈四官穎博學彊記吐辭成文書判下筆千言援據經史切當事情倉卒之際對偶皆精讀者驚嘆性剛果臨政善斷不畏彊禦尤惡言神異所至毀淫祠以正直稱

王邁字貫之仙游人登嘉定進士爲潭州觀察推官內艱調浙西安撫司幹官會廷試詳定官王元春欲私所親寘高第邁植其繆元春怒嗾諫官李知孝誣邁在殿廬譁聲調南外睦宗院

教授真德秀守福州邁竭忠以裨郡政名試學士院對策論楮幣曰國貧楮多弊始於兵乾淳初南北休息行楮幣止二千萬開禧兵興增至一億四千萬紹定有事山東增至二億九千萬議者徒患楮窮而弗懲兵禍用寡謀之人試直突之說能發而不能收能取而不能守今惟核軍實窒邊釁此拯楮幣第一義也又言修內司營繕廣內帑宣索多厚施緇黃濫予嬪御若此未嘗裁摶徒聞有括田權鹽之議向使其事可行故相行之久矣今更化伊始柰何取前日所不行者而行之乎又言今君子之類雖進而其道未行小人之迹雖屏而其心未服德秀聞邁對善之或傳史嵩之復用邁言嵩之姦儉刻薄天下共知朝廷論相不與天下共謀之借使復用則君子空於一網矣邁出疎遠見上空隱無隱上頗覆容之言者劾其過當改通判漳州

禋祀雷雨邁應詔言君不可欺天臣不可欺君厚權臣而薄同氣爲歎天之著天與寧考之怒久矣麴蘖致疾妖冶伐性初秋踰旬曠不視事道路憂疑綱淪法斃上行下效京卒外兵狂悖迭起陛下不是之思方用故事策免三公環顧在廷莫知所付乃遙相崔與之臣恐與之不至國柄必他有所屬此世道否泰君子小人進退之機也於是臺官李大同言邁交結德秀了翁咨夔以收虛譽削一秩免蔣峴又劾邁妄論倫紀請坐以罪削二秩淳祐改元復通判吉州江萬里言邁其才可惜不名將有老不及之歎帝以爲然有尼之者祇除知邵武軍以蕭舉應詔驛奏七事復以立濟王後爲先鄭清之名爲左司郎官直秘閣提點廣東刑獄力辭改侍右郎官予祠卒贈司農少卿邁本以學問詞章發身尤練世務李宗勉嘗論邁然邁獨許宗勉爲近

世賢相徐清叟與邁有違言邁應詔謂清叟有人望可用故世服其公

史彌鞏字南叔彌遠從弟好學彊記持論不阿入太學陞上舍登嘉定十年進士辟李璫鄂閩從事壽昌戍卒失律請誅倡首一人軍心咸服改知深永首嚴庠序之教端平初入監都進奏院嘉熙元年都城火應詔言天倫之變語載弘道錄出提點江東刑

獄遭歲旱饒信南康三郡大侵彌鞏釐戶爲甲乙丙丁戊以等第振糴全活一百十四萬有奇淮民三十餘輩操戈劫人逮捕法曹以不傷人論彌鞏曰持兵爲盜而以木傷貧之是滋盜也推情重者僂數人一道以寧饒州兵籍溢數供億不繼請汰冗兵令下營門大譟彌鞏呼諸校諭曰設有不當再許自陳敢譁者斬咸叩頭請罪諸營帖然名爲司封郎中以嵩之引嫌授直

華文閣知婺州句祠提舉崇禧觀卒年八十里若絕口不道時事真德秀嘗稱三十年不登宗袞之門未仕則爲其寄理已仕則爲其排擯矚然不污如此五子冑之終刑部郎官能之自之冑之俱進士冑之子蒙卿咸淳進士調江陰教授爲學淹博著書立言一以朱熹爲法

黃當字子耕隆興分寧人嘗從郭雍朱熹學熹深期之而當亦以道自任反復論辨必無所疑然後止出太學登第爲瑞昌主簿監文思院除知盧陽縣五溪獠獷悍爲詩諭之獠感悅莫敢違教轉通判處州經總制有額無錢俗號殿最綱當會十年中成賦酌取之閣免逋負錢額鈞等遂以最聞遷主管官告院累大理寺簿軍器監丞歲餘三轉當獨憤時不樂間行西湖慨然嘆曰我昔在南北山一木一石無不品題今無復情況何耶句

外得知台州先勸導後禁令訟牒清簡郡以大治立濟糶倉抵
當庫剗安濟坊以居病囚葬民之棲寄暴露者葉適謂營條目
建置憂民如家謝良佐子孫播越流落營求之民間收而教之
遷知袁州因哭從弟得疾卒所著有復齋集

楊大異字同伯唐天平節度使漢公之後十世祖祥避地醴陵
因家焉祥事親孝親亡哀毀泣盡繼之以血廬墓終身有白芝
白鳥白兔之瑞事聞封至孝公賜名木植墓道以旌之大異從
胡宏受春秋登嘉定進士調衡陽簿有惠政轉龍泉尉適歲饑
和糶米價頓增卽如價發糶民甚德之趙與篋大怒移安遠尉
邑有峒寇擾民官兵捕討弗獲檄大異往治大異以一僕自負
負告身肩輿入峒傳呼尉至賊露刃環立大異徐論以禍福
伏地叩頭願改過自新乃留告身爲質借其渠魁數輩出降以

功累遷四川制置司叅議官北兵入成都從制使丁黼巷戰敗
身被數鎗闔門遇難大異死而復甦其部曲負之以逃進朝奉
郎宰石門縣就除通判溧陽有惠政去官之日老弱攀號留之
擢登聞鼓院至大理寺丞平反冤獄者七召對極言時政忤宰
相意出知澧州進直秘閣提點廣東刑獄兼漕庾二司時責常
平逋負械繫追索奸蠹百出至卽與之約悉縱遣之負者如期
畢輸吏無所容其奸訪張九齡曲江故宅建書院以祀所至奸
吏屏息寇盜絕迹凡可以興利除害者必奏行之復建宣成書
院祀張栻呂祖謙廣海幅員數千里道不拾遺報政爲最木六
十七休除秘閣修撰大中大夫歸里第學者從之講肄諄諄相
與發明經旨條析理學食祠祿二十四年卒年八十二理宗嘗
稱其四川死節更生論事剴切有用之才也子霆霖霆見忠節

趙逢龍字應甫鄞人刻苦自修學問淹博登嘉定進士授國子
正太學博士歷知興國信衢衡袁五州提舉廣東湖南福建常
平有司例設供張悉命撤去日坐公署事至卽面決遣爲政務
寬恕撫諭惻怛一以天理民瘼爲言民不忍欺有逋賦卽爲代
輸尤究心荒政以羨餘爲平糴本遷將作監至宗正少卿兼侍
講凡道德性命之蘊禮樂刑政之事縷縷爲上開陳年八十八
終性淳實寡嗜欲不好虛名歎歷日久泊然不知富貴之味家
居講道四方從遊皆鉅公名士丞相葉夢鼎出判慶元修學子
禮常謂師門卑陋欲市旁宅克拓之辭曰鄰里粗安一旦貧
彼雖勉從我能無愧哉或問何以裕後笑曰吾憂子孫學行不
進不患其饑寒也

孫子秀字元實餘姚人少從劉漢弼遊磊落英發抵掌極談神

采飛動登紹定進士調吳縣簿有妖人自稱水仙太保子秀按
治之沉諸太湖日詣學宮與諸生討論義理辟淮東總領所徵
督宜興縣圍田租旣還以水災告總領志曰軍餉所關汝獨不
爲身計乎子秀不顧力爭免之調滁州教授與人交久而益親
死生患難營救不遺力聞一善則手錄之改知金壇嚴保伍釐
經界結義役一切與民休息訟者皆令自詣不煩逮繫不實者
往往自返惟豪黠有犯則痛繩不少貸有淮民流入振撫不遺
樹廬括田拔其能者分而治之崇學校明教化行鄉飲酒禮訪
茅山書院故址新之以待遠方遊學之士遷慶元通判主管浙
東鹽事先是諸場鹽有附餘名五釐鹽提舉以爲正數子秀奏
蠲之以紓民困辟幹辦行在諸司糧料院擢知衢州盜起江山
玉山間爲擇習熟土俗之人立保伍選用土豪旌常山令陳謙

亨寓士周還淳等捍禦之勞表於朝人心由是競勸甫七日擒四十八人以獻終其任賊不復動大水冒城郭子秀治橋梁修堰牐補城壁濬水源助葺民廬振以錢米奏蠲秋苗萬五千有奇復代納夏稅蠲公私一切逋負及岷溪沙壅之田民困復蘇孔氏裔孫自南渡後權寓衢學因循無定址子秀撤廢寺奏立孔氏家廟如闕里既成釋菜以最遷太常宗正二丞金部郎官舊責州郡以必不可辦之泛數吏緣爲奸子秀日夜討論給冊轉遞以均其輸遷將作監兼右司與丁大全不合差知吉州提舉浙西常平屬大全盡奪亭民鹽本克羨餘猶不足則估籍虛攤一路騷動亭民流亡子秀請還其本五十餘萬貫奏省華亭分司定衡量之法流徙復業遷浙西提點刑獄兼知常州淮兵浮寓給餉不時死亡相繼爲請於朝創名忠衛軍置砦以居裁

撥上供贍之盜劫吳大椿前使諱其事誣大椿與兒子熿爭財相劫追毀大椿官徙黜其賊獲子秀得其實悉平反之尋罷兼郡得專聖臬事擊貪舉廉風采凜然犴獄爲清進大理少卿直華文閣復提點浙東刑獄兼知婺州覈勢家山無賦稅者勢家以爲厲已喉言者論改浙西子秀與州縣約獄訟到限徑詣庭下吏不得要索亦無違者創循環總匣一日一遣公移總實於匣事無大小纖悉畢具安吉有婦人賂宗室子殺其夫二僕救之併殺以滅口反誣他人郡守捐賞捕之不獲子秀廉得之遠近稱爲神明以請罷移之江東度宗進太常少卿兼右司郎官尋知臨安復改婺州卒

李曾伯字長孺軍懷人後居嘉興歷通判濠州遷軍器監簿通判鄂州兼沿江制置主管機宜文字遷累太府卿准東制置使

兼督府叅議官疏奏答天心重地勢協人謀三事又言邊餉貴於廣積將材貴於素儲賞罰不可不精戰士不可不恤淳祐初歷淮西制置使權兵部尚書六年正月朔日食應詔歷陳先朝因天象以謹邊備圖帥材乞早易闕寄放歸田里又請修浚泗州西城加煥章閣學士以論罷九年起知靜江府歷知江陵兼湖廣總領京湖屯田使進龍圖閣疏言襄陽新復之地城池雖修浚州野未泐闕室廬雖草創市井未阜通請蠲租三年從之改廣南制置大使兼知靜江府築關隘練民兵峒丁申嚴防遏奏廣西蕞爾民懼不耕詔許復三年租役二年半徵守令勸墾多者賞之開慶元年進觀文殿學士諫議沈炎追論帥嶺南時開城不能捍禦罷之起知慶元兼沿海制置使侍御史陳宗禮復論職德祐元年追復元官初與賈似道俱爲閩帥邊境之

事知無不言以似道嫉之不竟其用

陳埜字子爽嘉興人歷知隆興慶元召爲右司郎官進右文殿修撰知平江侍郎趙必愿舉其最詔權工部侍郎兼中書門下檢正諸房公事入奏願聖宗轉移世道之樞機砥礪士夫之廉恥使知名義爲重利祿爲輕恬退者名之容悅者斥之君臣上下皆以真實相與使四維旣張則士大夫難進易退之風當見於聖世矣未幾知婺州兼江東轉運副使請蠲放諸郡災傷加戶部侍郎淮東總領尋提領江淮茶鹽兼知太平州發公帑代三縣輸折絲帛錢又作浮淮書堂以處兩淮之民而教之改廣州權吏兵戶三部尚書知潭州兼湖南安撫使提舉太平興國宮奉祠卒諡清毅埜屢領麾節軍民愛戴幕客甚多而樂薦士所著可齋說藁二十卷

明刑部員外郎仁和弘齋邵經邦學

皇清翰林院侍講學士四世孫遠平校閱

后妃 宋七之一

太祖母杜氏

后賀氏

宋氏

太宗后尹氏

符氏

李氏

真宗母李氏

后潘氏

劉氏

妃楊氏

沈氏

仁宗母李氏

后郭氏

曹氏

妃張氏

苗氏

周氏
馮氏

英宗后高氏

神宗后向氏

妃朱氏

陳氏

哲宗后孟氏

妃劉氏

徽宗后

王氏

鄭氏

妃王氏

劉氏

高宗母韋氏

欽宗后朱氏

杜氏定州安喜人父爽母范氏宣祖聘為婦初夢日入懷生太

祖其夕有神光照室中又夢神人捧日置于腹誕太宗凡生五

子封爵見後二女燕國陳國周顯德三年太祖爲定國軍節度使封南陽郡太夫人陳橋變時人走報太后點檢已作天子太后曰吾兒素有大志今果然禪位尊爲皇太后贈父太師建隆二年五月癸亥朔不豫帝侍藥餌不離側爲赦雜犯死罪以下疾亟召趙普入受遺命因問帝曰汝知所以得天下乎正由周世宗使幼兒主天下耳使周有長君天下非汝有也汝百歲後當傳位光義再傳光美光美傳德昭四海至廣萬幾至衆能立長君社稷之福也帝泣拜受命后顧謂普曰爾同記吾言不可違也遂崩于滋德殿年六十初諡明憲祔享太廟乾德二年更諡昭憲合祔安陵

太祖二后賀氏陳留人晉開運初父景思爲軍校與宣祖同居護聖營因聘娶焉後官右千牛衛率府率后性溫柔恭順動以

禮法初與杜后同封會稽郡夫人生秦晉二公主并魏王德昭周顯德五年薨年三十建隆三年四月追冊爲皇后葬安陵西北初享別廟神宗時祔太廟諡曰孝惠 王氏邠州新平人父饒彰德軍節度太祖爲殿前都點檢聘爲繼室恭勤不懈仁慈御下事杜太后得其懽心初封琅邪郡夫人建隆元年八月冊爲皇后常服寬衣佐御膳善鼓琴晨起誦佛書乾德元年十二月崩年二十二葬安陵北同享別廟太平興國二年祔享太廟諡曰孝明

宋氏洛陽人父俛外戚有傳母漢永寧公主后甫及笄隨母入見周太祖得賜冠帔乾德五年俛任華州節帥隨母歸鎮太祖召見亦賜冠帔俄復隨母來賀長春節值王后崩開寶元年二月遂納入宮爲皇后時年十七性柔順好禮每帝視朝退常候

迎接入佐御饌太祖崩后在內廷見太宗愕然遽呼曰吾母子之命皆託于官家太宗曰共保富貴無憂也更號開寶皇后遷居西宮雍熙四年移居東宮至道元年四月崩年四十四三年正月祔葬永昌陵北神主享于別廟神宗時升祔太廟諡曰孝章

太宗三后尹氏天水人徙大明父廷勛滁州刺史后歸太宗早薨追冊皇后諡淑德祔廟符氏父彥卿外戚有傳周顯德中娶建隆初封汝南郡夫人再進楚國夫人開寶八年薨年三十四葬安陵西北追冊皇后諡懿德享于別廟至道三年升祔太廟

李氏功臣處耘女開寶中太祖為聘既納幣會太祖崩太平興國三年始入宮年十九雍熙元年十二月立為皇后性恭謹莊

肅撫育諸子及嬪御甚厚真宗立尊為皇太后居西宮嘉慶殿咸平二年別建宮居之名曰萬安咸平六年十二月甲戌不豫詔求良醫赦天下死罪一等流以下釋之景德元年崩年四十五祔葬永熙陵諡曰明德從禮官請三后以次同祔太宗廟室李賢妃真定人父英乾州防禦使開寶中太祖聞妃有容德為太宗納之初封隴西郡君進夫人生楚王元佐太宗即位夫人夢日輪逼已以裾承之光耀遍體驚而寤遂生真宗太平興國二年薨年三十四真宗即位追上尊號為皇太后諡曰元德咸平三年祔葬永熙陵命宰相李沆為園陵使車駕詣普安院攢宮素服行禮拜伏嗚咽知制誥梁周翰撰哀冊神主祔別廟祥符元年追贈父檢校太尉安國軍節度使常山郡王母魏國太夫人三年禮官趙湘請以后祔太宗廟室真宗以為重事令執

政會議至六年秋宰相王旦率羣臣表請后尊號中去太字升
祔太廟明德之次從之

真宗三后潘氏功臣美之女初在韓邸聘納封莒國夫人端拱
二年薨年二十二卽位追冊皇后諡莊懷葬永昌陵之側陵名
保泰神主享于別廟 郭氏太原人父守文見外戚傳真宗在
襄邸復聘之連封魯秦國夫人生溫王禔周王祐昌王祗信王
祉欽王祈皆早亡真宗嗣位立爲皇后謙約惠下惡奢靡族屬
入謁禁中服飾華侈必加戒勗遇以家事求請於上終不許凡
子出嫁欲祈恩資后但出裝具給之上素禮重景德四年從幸
西京還以疾崩年三十二上深加嗟悼禮官奏七日釋服特增
至十三日靈駕發引命學士楊億撰哀冊葬永熙陵西北初諡
莊穆祔神主別廟後升祔真宗廟

劉氏太原人曾祖惟嶽祖延慶晉漢間爲右驍衛大將軍父通
宋初掌禁旅從潘美征廣南又累戰北面積勞至虎捷都指揮
使嘉州刺史征太原道卒贈潁州防禦使后方襁褓而孤鞠於
母龐氏外家因徙益州華陽年十五蜀人龔美攜以入京納于
襄邸王乳母秦國夫人性嚴整爲太宗言令王斥之王不得已
置指使張耆家卽位召爲美人因以美爲兄弟更其姓劉祥符
中自脩儀進德妃專寵後宮會章穆崩欲立爲后學士李廸言
妃起於寒微不可以母天下帝不從竟立之天禧中帝久疾政
事多決於后時宗人交橫于蜀奪民鹽井事聞上以后故欲赦
之寇準請必行故失后意旣而詔皇太子開資善堂引大臣決
事 后專裁制於內帝崩遺詔尊爲皇太后軍國重事權取處分
丁謂等請太后御別殿后遣張景宗雷允恭諭旨皇帝視事當

朝夕在側何須別御一殿馮拯等三上表請帝與后五日一御承明殿帝位左太后位右垂簾決事百官表賀太后哀慟從有司請制令稱予而便殿處分仍稱吾以生日爲長寧節頒父諱於天下出入御大安輦鳴鞭侍衛如乘輿天聖二年上尊號曰應元崇德仁壽慈聖皇太后御文德殿受冊三年正月辛卯長寧節帝率羣臣及契丹使上壽于崇政殿五年正月御會慶殿羣臣及契丹使者班廷中帝再拜跪上壽七年冬至又率百官朝于會慶殿并上壽九年正月詔長寧節賜百官衣并宴犒並如乾元節明道元年冬至復御文德殿帝率羣臣上壽有司陳黃麾仗設宮架登歌二舞二年二月乙巳朔謁太廟乘玉輅服禕衣九龍花釵冠齋下麤質明服袞衣十章減宗葵水藻去冠劍儀前後垂珠翠十旒薦獻七室皇太妃亞獻皇后終獻禮畢

加上尊號曰應天齊聖顯功崇德慈仁保壽皇太后三月庚寅不豫大赦除常所不原悉召天下醫速馳赴京甲午崩壽六十五以后服歛諡曰莊獻明肅葬永定陵之西北舊制后惟一諡稱制加四諡自后始追贈三世皆太師中書令父卒初窆京城西贈尙書令諡武懿後改葬祥符鄧公原加封魏王真宗御製祭文后臨奠母越國夫人錢氏加號魏王妃兄惟演子瞻山集賢校理加二官有龔知進者通之友婿亦贈衛尉卿先是仁宗始生后鞠爲己子顧復甚至卽位嘗諭輔臣曰皇帝聽斷之暇宜詔名儒講習以輔其德命設幄崇政殿之西廡日延近臣侍講讀其所以保護盡力而帝奉之亦甚備雖春秋長猶不知宸妃所出也兼以恩威在已賜與有節自丁謂曹利用貶竄天下惕然畏之漕臣劉綽從京西還言賸糧千餘斛乞付三司后問

曰卿識王曾張知白呂夷簡魯宗道否此豈因羨餘進哉柴李
二公主見猶服髮髻念其已老賜以珠璣叩首時潤王元汾夫
人李氏亦老髮且落因以爲請后曰大長公主尊行也若趙家
老婦寧可比也侍者見上嬪御簪珥珍麗欲效之后諭曰彼皇
帝嬪御飾也汝安得學小臣方仲弓上書請依武后故事立劉
氏七廟程琳又獻武后臨朝圖后擲其書于地曰吾不作此負
祖宗事晚節稍進外家任內官羅崇勳江德明等訪察外事遂
勢傾中外兄子從德死姻戚門人厮役拜官者數十人御史曹
脩古等論奏悉逐之進士林獻可疏請還政竄之嶺南侍御史
張存諫不聽崩後始內徙諸嘗爲后所謫者復死者官其後言
者多追詆垂簾時事帝曰此朕所不忍問也下詔戒中外母輒
言惟演請三后並祔帝詔三省與禮院議皆以章穆位崇中壺

已祔真宗廟室自協一帝一后之文明肅處坤元之尊章懿感
日符之貴功德莫比宜崇建新廟同殿異室歲時薦饗一用太
廟之儀慶曆五年禮院復請遵懿德明德元德同祔故事一併
章獻章懿遷祔真宗廟從之

淑妃楊氏益州郫人祖瑄父知儼儼弟知德隸禁軍爲天武副
指揮使妃年十二得選入皇子宮卽位拜才人進婕妤至婉儀
特升從一品位昭儀上帝東封西祀凡巡幸皆從時章獻尙爲
脩儀位幾與埒而妃通敏有智一意奉順初無所忤日見親愛
加封淑妃仁宗方乳章獻使護視凡起居飲食必與之俱所以
擁佑扶持恩意勤備真宗崩遺制尊爲皇太妃仁宗卽位常召
其姪承德見禁中欲授以諸司副使妃辭曰小兒豈勝大恩更
命爲右侍禁章獻崩遺誥尊爲太皇后與皇帝同議軍國事閣

門趣百僚賀中丞蔡齊目臺吏母追班同御史龐籍入白執政
剛去同議軍國事語第存后號奉緡錢二萬助后湯沐後更名
所居宮曰保慶稱保慶皇太后景祐三年無疾崩年五十三殯
於皇儀殿諡曰莊惠祔葬永定陵帝思其保護之恩命禮官議
加服小功帝未有嗣后母勸帝擇宗子近屬賢者養于宮中卽
英宗也英宗立言者謂禮慈母於子祭於孫止請廢后廟瘞主
園陵英宗弗欲遽下有司議未上會帝崩遂罷 貴妃沈氏宰
相倫孫女祥符初以將相家女選入宮爲才人歷美人婕妤充
媛爲人淑儉少華上以其家世厚待之眞宗將冊后以問叅政
趙安仁以沈氏對翼曰又語王欽若欽若笑曰臣固知其必以
此言彼常爲倫門客上以爲然未幾能安仁政事慶曆四年封
爲德妃婉儀杜氏爲賢妃俄沈氏又進貴妃薨年八十三許出

殯其家車駕臨視輟朝諡昭靜

宸妃李氏杭州人祖延嗣錢氏時爲塗華主簿父仁德終左班
數直妃初入宮爲司寢侍章獻太后莊重寡言嘗夢二日在天
一忽墜以裾承之旣而有娠從帝臨砌臺玉釵墜妃心惡之帝
卜釵完當生男子左右取以進果不毀帝甚喜已而果生仁宗
在襁褓時劉后取爲己子妃嘿處嬪御中未嘗自異人畏劉后
亦無敢言封崇陽縣君進才人歷婉儀順容從守永定陵明道
元年疾革進位宸妃薨年四十六太后欲以宮人禮治喪于外
呂夷簡奏禮宜從厚太后遽引帝起有頃獨坐簾下召問曰一
宮人死相公云云爲何夷簡曰臣待罪宰相事無內外皆當預
聞后怒曰相公欲離間吾母子耶夷簡從容曰陛下不以劉氏
爲念臣不敢言尙念劉氏則禮宜從厚太后悟夷簡請治喪用

一品禮殯于洪福院。又語都知羅崇勳當殮以后。服用水銀實棺。異時勿謂夷簡不言也。崇勳如言入奏。太后從之。太后崩。燕王始爲帝言。陛下乃李宸妃所生。妃死以非命。帝號慟累日。不視朝。下詔哀痛自責。尊爲皇太后。諡莊懿。卽日駕幸殯所。哭臨祭告。易以梓宮。開視玉色如生。冠服與后無異。嘆曰。人言其可信哉。遇劉氏加厚。陪葬永定陵。廟曰奉慈。又卽景靈宮建神御殿。曰廣孝。舊制后諡必冠帝號。慶曆中。禮官因眞宗尊號奉改。莊懷莊穆莊懿莊懿莊並爲章升祔太廟。

仁宗二后郭氏。應州金城人。祖崇。見外戚天聖二年。與左驍衛大將軍張美女同被選入宮。上欲立張氏。太后雅意屬郭氏。而以張氏爲美人。郭后旣立。倚章獻之勢。頗驕橫。後宮爲所迫。不得進。太后崩后。遂見疎。帝專寵張美人。明道二年薨。追冊爲后。

益幸美人尙氏楊氏。賞賜無算。恩寵傾京師。后妬之。數與忿爭。尙氏於上前不遜。有侵后語。后不勝忿。批其頰。上自起救之。誤批上頸。上大怒。都知閻文應因謀廢后。勸上以爪痕示執政。上問宰相呂夷簡。古來有此事否。適夷簡有怨于后。對曰。古亦有之。上意遂決。詔稱皇后無子。自願入道。特封爲淨妃。玉京冲妙仙師。賜名清悟。居長寧宮。號金庭教主。冲靜元師。後帝頗念之。遣使存問。賜以樂府。后和答以進辭。甚怗惋。帝益悔恨。有旨密召入內后。辭曰。若果回天。須百官立班受冊。方可。遂不赴。明年屬有小疾。遣文應挾醫診視。數日以暴薨。聞中外疑文應進毒。而不得其實。上深悼之。三年正月壬辰。追復皇后。丁酉葬之。惟停諡冊祔廟之禮。

曹氏武惠王彬孫女。郭后廢。詔聘入宮。景祐元年九月冊爲后。

素性慈儉重女工深知稼穡常於禁苑種穀親蚕不樂嬉遊帝將以閏正月望夕再張燈后諫止之後三日親從官顏秀等作亂傷殿下宮嬪聲欲帝所宦者以乳姬歐小女子給奏后叱曰賊在近殺人敢妄言耶度賊必縱火陰遣人挈水踵其後果舉炬焚簾水隨滅之所遣宦侍親剪髮諭之曰行賞用是爲驗故爭盡死力賊遂禽滅英宗卽位尊爲皇太后帝感疾請權同處分軍國事上太后宮殿名曰慈壽命稱聖旨出入儀衛如章獻故事檢柅曹氏及左右臣僕毫不假借宮省肅然中外章奏日數十往往援經史以決事明年四月帝疾愈后手書撤簾還政帝持書不下及秋始行之宰相韓琦白后求去荅曰相公安可告退老身合居深宮耳每日在此甚非得已琦奏曰果爾雖前代馬鄧不如未審將以何日撤簾太后遽起琦命鸞儀司撤簾

猶於屏後見御衣也神宗立加尊太皇太后名宮曰慶壽帝致極誠孝所以承迎娛悅無所不盡從行登翫每先後策掖后亦慈愛天至或退朝稍晚必至屏帟候矚親持饌飲食帝王安石當國亂政后乘間語帝曰祖宗法度不宜輕改熙寧宗祀前數日帝至后所語曰吾昔聞民間疾苦必以告仁宗因救行之今胡不然帝曰時無他事有亦當爾后曰吾聞民間甚苦青苗助役亟宜罷之安石誠有才學然怨之者衆欲愛惜保全之不若暫出之於外帝爲悚聽舊制外家男子毋得入謁后春秋高弟侑亦老帝數言宜使入見不許他日復請乃許之與侑偕詣后問少頃帝先起欲令特侑親意后遽曰此非汝所得留趣遣出晚得水疾侍醫莫能治元豐元年驛召天下醫者二年冬疾甚帝省視寢門經旬衣不解帶崩日壽六十四初帝嘗有意燕薊

已與大臣定議詣慶壽宮白其事。后曰：「事體至大，吉凶悔吝，生乎動，得之不過南面受賀而已。」萬一不諧，則生靈所係，未易以言。苟可取，太祖、太宗取之矣。何待今日？帝曰：「敢不受教。」蘇軾以詩得罪，下御史獄。且不測，后違豫，中聞之，謂帝曰：「嘗憶仁宗以制科得軾兄弟，喜曰：『吾為子孫得兩宰相。』今聞軾以作詩繫獄，得非仇人中傷乎？措至於詩，其過微矣。吾疾勢已篤，不可以寬濫致傷。中和帝涕泣，軾由此得免。及崩，帝哀慕毀瘠，殆不勝喪。有司上諡曰：『慈聖光獻。』附葬永昭陵，推恩曹氏進官者四十餘人。」

貴妃張氏，河南永安人。祖頴，由進士終建平令。父堯封孝謹，好學，登進士，為石州推官。蚤卒。母錢氏，將孝孤，隨從父堯，佐官屬。以道遠辭，幼無所依，母乃納于童。惠，皇后宮寢長巧慧多智善。

於承迎得幸。仁宗盛有寵勢，動中外。慶曆元年封清河郡君。歲中為才人，遷脩媛。皇祐初進貴妃。後五年薨，年三十一。帝甚哀悼，治喪皇儀殿，追冊為皇后。諡曰：「溫成。」為起園陵，卽園立廟享祭。用樂，追封父中書令清河郡王，諡景思。母越國太夫人而堯佐亦因緣遂致通顯。苗氏，開封人。父繼宗，母許氏。先為仁宗乳保，及登位，妃以容德入侍。生雍王，斯福康公主。封仁壽郡君。由才人昭容進位德妃。育英宗於禁中，命妃擁佑，頗有恩。踐阼，酬其前勞，加封貴妃，贈父太師吳國公，母陳楚二國夫人。福康下嫁，當她恩，外家抑不肯言。元祐六年薨，年六十九。帝輟朝，出奠發哀。苑中諡曰：「昭節。」周氏，開封人。幼育張貴妃所為女。得侍仁宗。在秦燕國兩公主。帝崩，妃日一蔬食，屏處一室，誦佛書。困則假寐，覺則復誦。晝夜不解衣者四十年。二主下嫁，連進至

賢妃徽宗加貴妃歷五朝勤約一致積所俸賜啓壽藏於周氏
瑩南傍建僧舍費緡錢六萬皆出貯儲燕國先亡詔許出外第
與親戚相往來年九十三薨諡昭淑 楊氏定陶人以章獻后
姻選爲御侍封原武郡君進美人性端麗機敏妙音律組紉書
藝一過目如素習父忠爲侍禁仁宗欲加獎擢辭曰恩澤微侍
恐啓左右請謁之端帝悅命徙居肅儀殿贈其祖貴州刺史仍
官其叔第五人郭后既廢楊尚二美人益有寵每夕侍寢上體
多爲之憊景祐元年帝忽不豫楊太后亟以爲言並廢尚美人
爲道士居洞真宮楊美人居瑤華宮賜名崇妙後復召爲婕妤
歷脩媛脩儀熙寧五年薨年五十四贈德妃 馮氏東平人曾
祖炳知雜御史祖起兵部侍郎以良家女侍仁宗生邢魯國二
公主封始平郡君累加才人婕妤脩容在禁掖幾六十年始終

五朝動循禮度薨年七十七贈賢妃

英宗皇后高氏家世見功臣及外戚母曹氏慈聖光獻妃姊也
故后少鞠宮中生與英宗同年既長遂婚濮邸生神宗岐嘉二
王寶安壽康二主嘉祐八年冊爲皇后神宗立尊爲皇太后居
寶慈宮元豐八年帝不豫宰執王珪等入問疾乞立皇太子太
后權同聽政帝領之退見太后時哲宗爲延安郡王后擁於簾
下泣見珪等曰皇子性至孝從學穎悟絕不好弄已誦論語七
卷自上疾未常去左右手書佛經以祈福乃令王出簾外見珪
等皆拜且賀是日降制立爲皇太子陰救中人梁惟簡製十歲
小兒黃袍來進蓋密爲踐祚倉卒備也哲宗嗣位尊爲太皇太
后宮名崇慶殿名壽康臨朝大革熙豐弊政名司馬光呂公著
文彥博以復祖宗法度爲先務且令亟疏人才可用者彙進於

廷以常平舊式改青苗以嘉祐差役參募役除市易害民之法
這茶鹽煩擾之禁捐邊砦不毛之地一時海宇危而復安契丹
主戒勿生事疆場曰南朝盡行仁宗政矣上元燈宴后母當入
觀止之曰夫人登樓上必加禮是由吾故而越禮制於心殊不
安但令賜之燈燭歲以為常蔡確坐車蓋詩得罪后謂大臣曰
蔡確妄稱有定策功扇搆事端為異時眩惑地吾不忍明言姑
託訕上為名逐之耳臨朝凡九年力絕內降抑止外家私恩弟
士林為崇班帝以供奉久欲遷其官辭曰士林獲升朝籍分量
已過豈宜授先后家比姪公繪公紀當轉觀察使亦止之帝請
至再僅遷一秩終后之世不敢改時朝廷清明華夏綏定人以
為女中堯舜有疾之日帝不視事禱于天地宗廟社稷諸陵并
嶽瀆宮觀祠廟赦天下崩年六十九諡曰宣仁聖烈神主祔廟

葬永厚陵詳見帝記

神宗后向氏宰相敏中曾孫女治平三年歸于穎邸初封安國
夫人即位立為皇后帝不豫贊宣仁定建儲之議立哲宗尊為
皇太后初居慶壽後殿名隆祐宮殿曰慈徽凡事一遵宣仁不
以恩私外家帝將卜后及諸王納妃后救向族屬勿以女真選
中族黨有欲援例換閣職及為選人求京秩者后悉拒之帝倉
卒晏駕奸相章惇有違言欲立母弟簡王后曰老身無子諸王
皆神宗庶子莫難如此分別惇復曰若長期當立申王后又曰
申王有疾不可惇尚欲言曾布叱曰章惇聽太后處分遂決策
迎端王惇不能沮徽宗立請太后權同處分軍國事性簡素不
立誕節不御正殿不避家諱一意賓名故老還所斥逐賢士及
寬薄徭賦息兵省費愛民崇儉中外咸稱能守家法臨朝纔六

月卽還政于帝十二月甲午不豫禱于宮觀祠廟嶽瀆明年正月崩壽五十六諡曰欽聖憲肅葬永裕陵祔廟如儀數加恩兩舅宗良宗回皆位開府儀同三司加封郡王自敏中以上三世亦追列王爵非常典也

妃朱氏開封人本姓崔父傑早世母李氏更嫁朱士安從其姓熙寧初選入宮爲御侍進才人至婕妤生哲宗及蔡王徐國公主累封德妃卽位尊爲皇太妃元祐三年宣仁下詔春秋之義母以子貴其尋繹故實務致優隆命有司具輿蓋仗衛冠服悉侔皇后紹聖中欽聖復命卽閣建殿改車爲輿出入山宣德東門百官上殿稱殿下名所居爲聖瑞宮徽宗立尊爲聖瑞皇太妃崇寧元年二月有疾慮京畿囚辛丑薨年五十一追卹爲皇太后祔廟諡曰欽成 陳氏開封人自幼穎悟莊重入爲掖庭

御侍卽得幸生徽宗進美人神宗崩命守陵殿思顧舊恩毀瘠骨立左右進粥藥麾使去曰願得早侍先帝足矣年甫三十二薨建中靖國元年追卹爲皇太后諡曰欽慈與欽成陪葬永裕陵 林氏祖特父洙見宰輔彙妃幼選入宮侍神宗初封永嘉郡君升美人生燕王俛越王偲并邢國公主進婕妤元祐五年薨詔用一品禮葬贈貴儀至賢妃 同時武氏失其家世亦以選入元豐五年進才人生吳王佖并賢和公主歷美人婕妤徽宗卽位進昭儀至賢妃大觀元年薨乘輿臨奠輟朝諡惠穆 哲宗后孟氏洛州人祖元符州防禦使馬軍都虞候父在閣門祇候后年十六詔選世家女百餘入宮宣仁與欽聖皆愛之教以女儀諭宰執孟氏子能執婦禮宜正位中宮又以近世儀頗簡略詔禮官議册后六禮 詳見弘道錄 册立之日仍詔贈元爲太尉

進父榮州刺史封母王氏華原郡君及太后崩劉婕妤有寵后
恩益衰章惇陰附婕妤欲誣宣仁以后經事欲併廢之而立
婕妤所生女福慶公主有疾后姊頗知醫以嘗愈后危疾得出
入禁掖至是用藥弗效持道家符水入治后驚曰姊不知宮中
禁嚴耶令左右藏之俟駕至具言其故即於帝前焚符帝亦以
常事不較而宮禁稍傳厭魅之端作矣未幾后養母聽宣夫人
燕氏尼法端與供奉官王堅爲后禱祠事聞上頗疑之詔入內
押班梁從政管當御藥院蘇珪卽皇城司鞫問逮宦官宮妾幾
三十人榜掠備至肢體毀折至有斷舌者獄成命侍御史董敦
逸覆錄罪人過庭下氣息僅屬無一人能出聲者敦逸秉筆疑
未下內侍郝隨等以言脅之敦逸畏禍就惇與隨所措以奏牘
上詔廢后出居瑤華宮賜號華陽教主玉清妙靜仙師法名泃

真詔下日天爲陰翳聞者寃之帝亦尋悔曰章惇壞我名節元
符未欽聖臨朝有布衣何文正上書欲復后位號卽命以官徽
宗下詔還后大內號元祐皇后崇寧初隨又諷蔡京使馮澥上
書臺臣錢通等連章論列徽宗從之詔依紹聖詔旨復居瑤華
宮加賜希微元通知和妙靜仙師靖康初瑤華宮火徙居延寧
宮又火出居相國寺前私第欽宗卽位議再復尊號爲元祐太
后詔未下而京城陷因是得獨存張邦昌周太祖迎周太后入
西宮故事尊爲宋太后迎居延福宮胡舜陟馬伸言政事當取
小旨乃復迎入禁中仍號元祐皇后始御內東門小殿垂簾聽
政尋降手書播告天下遣馮澥李回及兒子忠厚奉迎康王卽
皇帝位是爲高宗后以是日在東京撤簾建炎元年尊爲元祐
太后奉如東南尙書省言犯后祖名易以所居宮名稱隆祐太

后上將幸揚州命侍衛指揮郭仲荀衛后先行駐揚會張浚請先定六宮所居地詔忠厚與苗傅扈至杭州踰年傅與劉正彥謀作亂太后諭曰自蔡京王黼變亂朝政童貫起邊事致國家大禍今皇帝聖孝無失德止爲黃潛善汪伯彥所誤皆已逐矣汝寧不知耶傅等必欲立皇太子后曰今強敵在外我一婦人抱三歲小兒何以令天下傅等泣請太后力拒之帝聞事急詔元子禪位太后垂簾聽政每見凶黨曲加慰撫傅等皆喜召見韓世忠妻梁氏勉令速來以清殿陛及勝非誘傅等復辟命王世脩草狀進呈太后喜曰吾責塞矣手札趣帝還宮卽欲撤簾趙鼎張浚謂復辟功大帝仍請一出御殿上皇太后尊號太后聞浚忠義欲一識面帝爲召至禁中垂簾見之丞議郎馮楫常歸書苗傅勸復辟太后白其事楫得遷秩將幸建康命簽樞鄭

鼓衛后繼發比至帝率羣臣迎于郊會防秋迫命劉寧罷制置江浙衛往洪州百司非預軍事者悉從復慮敵人來侵命楊惟忠將兵萬人爲衛密諭同行滕康劉珪緩急取太后旨便宜以行會劉光世屯江州不爲備金果白大冶縣徑趣洪州康珪奉后行次吉州金人追悉御舟夜行質明至太和縣舟人景信反惟忠兵又潰失宮人百六十人康珪俱遁兵衛不滿百亟趨虔州帝慮徑入閩廣遣使詢訪命中書舍人李正民朝謁時虔州府庫皆空衛軍所給皆沙錢市買不售與百姓交鬪縱火肆掠土豪陳新幸衆圍城康珪等弗能禁惟忠步將胡友自外引兵破新于城下帝聞罷康珪代以盧益李回論輔臣曰朕初不識太后自迎至南京愛朕不啻已出今在數千里外兵馬驚擾朝夕慕念當亟奉迎以愜朕意復遣御營都統辛企宗帶御噐械

引傳錄
潘永思迎歸至越帝親迓于行宮門外通問所過守臣治狀自
入宮微若風眩有宮人自言善符呪太后驚曰吾豈復聞此語
卽立命出之及誕辰帝置酒宮中從容語帝辨明宣仁太后誣
枉語載弘道錄自是事始得其正而奸臣情狀益著矣帝事太后極
孝帷帳皆親視或得時菓必先獻然後敢嘗宣教郎范燾與忠
厚有憾誣與太后密養欽宗子帝曰朕於太后如母子安得有
此卽命治其罪紹興元年春患風疾帝且暮不離左右衣弗解
帶者連夕四月崩於行宮之西殿壽五十九遺命擇地攢殯俟
事寧歸葬園陵詔以繼體之重制期年服凡喪祭用母后臨朝
禮初上尊號昭慈獻烈推恩外家凡五十人殯于會稽之上皇
村耐土廟室位在昭懷后上三年改諡昭慈聖獻素性謙抑節
儉不許避父名上尊號有司月供祇給千緡幸南昌時斥賣私

絹三千匹充費有論忠厚直顯謨閣非所當授卽令易武階戒
家人不得預聞朝政通貴近至私第謁宰執以恩澤當得官者
近八十員未嘗陳請中遭權奸誣構顧能善始令終天意益不
可料云

劉氏素多才藝初爲御侍以明艷冠後庭能順意奉兩宮由美
人婕妤進婉儀加封賢妃帝盛寵之自恃有勢侍中宮不循妾
禮紹聖三年后朝景靈宮訖事就坐諸嬪御立侍獨婕妤背立
簾下直閣陳迎兒呵之不顧后閣中皆忿冬至日復朝欽聖於
隆祐宮故事惟后座朱髥金飾婕妤在他座有慍色從者爲易
座輒與后等衆弗能平因傳唱皇太后出伺衆借起或撤去婕
妤所坐尋各復位婕妤不知遂仆于地懟不復朝歸而泣訴于
帝內侍郝隨啓曰母以此戚戚願爲大家早生子此坐正當爲

婕妤有也乃陰造奇語以售其謗內侍劉友端爲之助竟廢孟后而代之所生子茂纔三月而夭右正言鄒浩以如嘗與后爭寵今一廢一立殊累盛德帝大怒除名編管徽宗立册爲元符皇后崇寧元年追册太子諡曰獻愍明年二月甲寅尊爲太后宮名崇恩帝緣哲宗故曲加恩禮后以是頗干預外事帝與輔臣議將廢之政和二年二月卽簾鈞自縊死諡曰昭懷祔葬永泰陵神主祔廟年三十五

徽宗二后皆開封人王氏德州刺史藻女元符二年歸于端邸初封順國夫人卽位册爲皇后生欽宗及崇國公主素性恭儉方輿王二妃尤寵巨閣妄意迎合誣以闇昧命刑部侍郎周鼎卽祕獄參驗無跡大觀二年崩年二十五初諡靜和葬裕陵之次紹興中始祔廟室改諡顯恭 鄭氏父紳由直省官累封太

師樂平郡王后與王貴妃本欽聖押班徽宗爲端王每朝慈德宮命二人供侍及卽位遂以賜之自入宮好觀書章奏能自製帝愛其才崇寧初封賢妃遷貴妃素性端謹善順承帝意遂有異寵多資以詞章天下歌之政和元年間爲皇后奏北兵多事國用未足合用冠服悉因舊物改製乞罷黃麾仗小駕鹵簿等儀從一應恩澤皆弗陳請復奏族子居中罷其樞任欽宗受禪尊爲太上皇后遷居寧德宮稱寧德太后從上皇幸南京金師退后先歸京師時議多言上皇將復辟於鎮江人情危駭用事者疑后歸將由端門直入禁中內侍皆勸上嚴備不從駕乃出迎于郊兩宮相見歡洽上皇聞之卽罷如洛之議後從幸青城遂不得還留于五國城凡五年崩年五十二紹興七年何蘇等使還始聞計高宗詔成服追諡顯肅祔主廟室以聞哀日爲忌

梓宮歸入境承之以擲納輦衣其中合攢徽宗永祐陵后既北
遷訴于粘罕曰妾有罪當行但家屬素不預朝政乞留不遣粘
罕許之紳故得歸流寓江南上憐之詔所在尋訪賜官有近屬
鄭藻紹興中帶御器械用祔廟恩拜隴州防禦使凡四使金歷
官至保信軍節度使加太尉卒追封榮國公王貴妃初封平
昌郡君進貴妃生鄆王楷莘王植陳王機惠淑康淑順德榮福
冲懿帝姬政和七年薨諡懿肅
妃劉氏初出甚微入宮大幸由才人七遷至貴妃生濟陽郡王
棧祁王模信王榛政和三年微疾帝不經意七月庚子趣召幸
已薨始大悲側特加四諡曰明達懿文又踵温成故事使皇后
表請冊贈爲皇后又有安妃本出酒家女與妃同姓劉氏養
以爲女天資警悟解迎意合旨遂大有寵由才人進至淑妃生

建安郡王模嘉國公椅英國公櫨并和福帝姬政和四年加貴
妃朝夕得侍上擅愛頗席嬪御爲之稀進擢其父劉宗元節度
使林靈素目爲九華玉真安妃肖其像于神霄帝君之左宣和
三年薨年三十四初諡明節和文旋加冊贈爲皇后

韋氏開封人初入宮爲侍御得幸夢神授胎遂生高宗崇寧末
封平昌郡君大觀初進婕妤累遷婉容欽宗內禪封爲龍德宮
賢妃從上皇北遷建炎初遙尊爲宣和皇后封其父安道爲郡
王官親屬三十人自此遣使不絕嘗號勸諭輔臣曰皇后春秋
高朕思之不遑寧處屈已講和正爲此耳學士朱震引唐建中
故事請遙尊爲皇太后而禮官吳表臣請依嘉祐治平故事俟
三年喪畢然後舉行帝先降御札播告天下追封后三代俱王
爵然猶未得歸期每輦感以爲若從朕請餘皆非所問也及王

倫面言許歸后未幾蕭哲來使亦陳后將歸狀乃豫作慈壽宮
遣莫將韓恕爲奉迎使十年猶未有期遙上皇太后冊寶於慈
寧殿生辰歲旦皆遙行賀禮洪皓在燕求得后手書遣李微持
歸帝大喜曰遣使百輩不如一書遂加微官金遣蕭毅邢具瞻
議和帝泣語養不及親還又面語丁寧命何鑄曹勛往報謝名
至內殿語備載弘道錄鑄等至首以爲請金主猶難之曰先朝業已如
此豈可輒改勛反覆再三伸帝之言金主默有允意命鑄等就
館館伴耶律紹文密傳主意許從所請洪皓聞之遣人報帝及
鑄等還具言其實遂命叅政王次翁爲奉迎使金遣其臣高居
安完顏宗賢等扈從以行后素聰明有智慮初聞許還三梓宮
恐其反覆呼役者畢集然後起攢時方暑憚行又慮有他變乃
陽稱疾須稱貸得黃金以犒其衆伺秋涼進發途中始無問言

二年四月次燕山自東平舟行由清河至楚州既渡淮命太
后弟韋淵秦魯國大長公主吳國長公主迎于道駕親至臨平
奉迎普安郡王宰執兩省三衙管軍皆從帝初見太后喜極而
泣八月至臨安入居慈寧宮向因梓宮未還輟樂至今及太后
壽節詔始用樂謁家廟親屬遷官幾車百人后在北方聞韓世
忠名舟次臨平呼至簾前慰勞帝侍宮中或至夜分后諭以且
休聽朝宜早恐妨萬幾兩宮給使宜令通用不可分彼我恐伎
人間言得易以入時皇后未立屢爲帝言帝請降手書太后曰
我但知家事外庭非所當預將行冊命承平典禮悉能記之帝
先意承志惟恐不及或一食稍減輒不勝憂懼常戒宮人曰慈
壽已及六十惟優游無事起居適意卽壽考康寧事有所闕慎
毋令知第白于朕十九年壽七十正月朔卽宮中行慶壽禮親

屬各遷官一等有微恙累月不出會牡丹盛開入白太后欣然
步至花所留宴竟日盡歡后常苦目疾醫皇甫坦愈之二十九
年太后壽八十復行慶禮親屬又進一等推及庶人年九十宗
子女若貢士已上父母年八十者悉官之九月得疾上不視朝
敕輔臣祈禱天地宗廟社稷救天下減租稅俄崩于慈寧宮諡
曰顯仁攢于永祚陵之西祔神主徽宗室親屬進秩復十四人
授官三人太后天性節儉有司進金唾壺易用途金宮中賜予
不過三數千所得供進財帛多積于庫至以給喪葬之費然好
佛老事四聖甚謹康王初出使有小妾言見四金甲人執刀劔
以衛以爲陰助北遷時常設祭及歸立祠西湖上
欽宗后朱氏祥符人父伯材武康軍節度使徽宗臨軒備禮册
爲皇太子妃生皇孫湛卽位立爲皇后追封父恩平郡王因從

北遷不知崩聞慶元四年正月己卯進上尊諡曰仁懷升祔廟
室授兄孝孫右金吾衛上將車卒贈開府儀同三司孝章承慶
軍承宣使卒贈昭化軍節度使

弘簡錄卷一百七十二

明刑部員外郎仁和引齋邵經邦學

皇清翰林院侍講學士四世孫遠平校閱

后妃 宋七之二

高宗后 邢氏 吳氏

妃 潘氏 張氏

孝宗后 郭氏 謝氏

光宗后李氏

妃黃氏

寧宗后 韓氏 楊氏

理宗后謝氏

度宗后全氏

妃楊氏

高宗二后邢氏祥符人父煥外戚有傳初聘居康邸封嘉國夫人康王出使夫人留居蕃衍宅從三宮北遷上皇遣曹勛歸夫人脫所御金環使內侍持付勛曰幸為吾白大王願如此環得早相見也王憐之及卽位遙冊為皇后官親屬二十五人紹興九年崩于五國城年三十四金人秘之上為虛中宮以待者十

八年迨太后回鑾始得崩聞輟朝行服諡曰懿節耐主別廟紹興十二年八月梓宮至攢于聖獻太后梓宮之西北淳熙末改諡憲節耐高宗廟 吳氏開封人父近武翼郎累贈太師追封吳王后年十四由康邸入宮卽位常戎服以待左右從幸四明衛士謀爲變問帝所在給之以免帝航海有魚躍入御舟后曰此白魚之祥也帝悅封和義郡夫人還進才人博習書史兼善翰墨由是寵遇日至遷婉儀尊封貴妃那后崩聞至宰臣秦檜等累表請立中宮紹興十三年立爲皇后帝御文德殿授册后卽穆清殿廷受之追王三代親屬官者三十五人顯仁性嚴肅后身承起居順適其意甚愛之嘗繪古列女圖置座右爲鑒又取詩序之義扁堂曰賢志會張賢妃薨后撫視普安常以爲人曰之表贊帝決意立之既受禪稱太上皇后遷居德壽宮上尊

號曰壽聖月朔朝上皇畢入見后如宮中儀乾道七年加號壽聖明慈淳熙二年上皇行慶壽禮復加壽聖齊明廣慈之號十年壽七十親屬推恩有差十二年加尊號曰備德上皇崩遺詔改稱皇太后帝欲迎還大內后以上皇几筵在德壽宮不忍去因名所御殿曰慈福居焉光宗卽位更號壽聖皇太后以壽皇太后嘗勸帝宜崇尚舊臣紹熙四年壽八十奉册禮加尊號曰隆慈備福五年正月復率羣臣行慶壽禮嘉王侍側勉以讀書辨邪正立綱常爲先孝宗崩正號太皇太后時光宗有疾不能執喪宰臣請垂簾主喪事后不可已而請如唐肅宗故事羣臣發喪太極殿后成服禁中代行祭奠禮許之尋用趙汝愚請於梓宮前垂簾宣光宗手詔立皇子嘉王爲皇帝翼日撤簾慶元元年加號光祐遷居重華宮後聞汝愚以謫死侂冑私人汪義

端目汝愚爲李林甫后大以爲非慶元三年十月寢疾禱于天地宗廟社稷大赦天下十一月二日崩年八十三遺詔太上皇帝疾未瘳宜於宮中承重皇帝服齊衰五月以日易月詔乃服莽年喪謚曰憲聖慈烈攢祔永思陵

妃潘氏張氏俱開封人潘父永壽直翰林醫官贈太子太師妃田康邸進生元懿太子卽位立爲賢妃太子薨從隆祐太后于江西與太后同御農夫而行得至虔州踰年亦薨張氏建炎初爲才人有寵進婕妤好時養宗子伯琮于禁中輔臣問誰可付託者帝意在婕妤因命母之等遷婉儀卒上爲輟朝贈賢妃弟萃閣門宣贊舍人遷秩二階

孝宗三后郭氏祥符人章穆皇后六世孫祖直卿奉直大夫孝宗爲普安郡王納之封咸寧郡夫人生光宗及莊文太子魏王

鄧王恪紹興二十六年薨年二十一封淑國夫人東宮建贈皇太子妃受禪追冊皇后謚安穆營阜陵寧宗改成穆祔廟父瑊累官昭慶軍承宣使追封榮王孝宗待郭氏恩禮彌厚然不假外戚官爵后弟師禹師元官不過承宣使光宗內禪除師禹節度使進少保寧宗進少傅加太保封廣陵郡王

夏氏袁州宜春人曾祖令吉爲吉水簿父協生后時有異光穿室竒之及長入宮爲憲聖閣中侍御普安夫人薨太后以賜王封齊安郡夫人卽位進賢妃奉上皇命立爲皇后乾道二年謁太廟親屬推恩十一人三年崩謚安恭寧宗改成恭權攢于臨安修吉寺謝氏丹陽人幼孤鞠於外家冒姓翟氏及長選入憲聖宮以賜普安郡王封咸安郡夫人卽位進婉容至貴妃淳熙三年侍帝過德壽宮上皇諭以中宮虛位遣張去爲傳旨立

爲皇后復姓謝氏推恩親屬十人光宗受禪上尊號曰壽成孝
宗崩尊爲皇太后慶元初加號惠聖嘉泰二年加慈佑太皇太
后作壽慈宮請還內九月己酉帝朝于壽慈宮開禧三年崩謚
成肅攢祔永阜陵后性慈儉減太官膳羊服澣濯衣數年不易
常戒弟淵崇謙抑遠驕侈帝雖在位久後宮罕所寵幸止蔡李
二貴妃餘無著聞者
光宗后李氏相州安陽人父道外戚有傳生時有黑鳳集營前
道心異之小字鳳娘聞皇甫坦善相令出拜之坦驚不敢受曰
女當母天下因言於高宗聘爲恭王妃封榮國夫人進定國生
嘉王擴光宗在東宮冊爲妃性妬悍嘗詣兩宮訴太子左右高
宗不懌語吳后曰是將種吾爲坦所誤孝宗亦屢訓后宜以皇
太后爲法及禪位冊爲皇后值帝得心疾壽皇購得良藥欲因

帝至宮親授宦者乘間語后曰太上合藥一大丸俟宮車過卽
投之萬有不虞柰宗社何后覘藥實有心術之尙未發頃之內
宴后請立嘉王爲太子壽皇未許后忿曰妾六禮所聘嘉王妾
親生何爲不可壽皇怒后退泣訴于帝言壽皇有廢嘉王意帝
惑其言退廢朝謁帝嘗浣手宮人奉盥視其手自悅之他日
遣人送食于帝啓盒視則宮人兩手也南郊帝宿齋宮后殺黃
貴妃以暴卒聞至夕風雨大作黃壇燭盡滅不克成禮帝疾由
是增劇不能視朝政事多決於后益肆驕侈追封三代爲王家
廟逾制衛兵多於太廟歸謁之日推恩親屬二十六人使臣一
百七十二人補官下至門客中典以來所未嘗有時帝久不朝
重華中外疑駭紹熙四年九月重明節宰執侍從臺諫連章請
帝給事中謝深甫懇切言太上春秋高父子至親天理昭然其

誠心愛陛下。亦猶陛下之愛嘉王也。帝感悟。趣命駕往朝。百官班列以俟。已出至御屏後。后挽留曰。天寒。官家且飲酒。百僚侍衛相顧莫敢言。舍人陳傅良引帝裾請母入。因至屏後。后叱曰。此何地。秀才至此。欲斫頭耶。傅良下殿慟哭。后使人問以何理。對曰。子諫父不聽。則號泣而隨之。后益怒。遂傳旨罷還宮。後太上崩。竟不能執喪。寧宗立。尊爲太上皇后。上尊號曰壽仁。慶元六年六月。違豫肆赦。崩。壽五十六。諡曰慈懿。權攢于南山。修吉寺。耐主太廟。黃貴妃初封和義郡夫人。上皇以賜。遂專寵。后怒之。紹熙二年冬十一月死。

寧宗二后韓氏琦六世孫。父同卿。外戚有傳。初與姊俱選入宮。后能順適。兩宮意遂歸。平陽郡。封新安郡夫人。進崇國夫人。王登祚。冊爲皇后。慶元六年崩。諡恭淑。權攢南山。廣教寺耐主。

太廟 楊氏會稽人。自少以姿選。慶元元年封平樂夫人。三年進婕妤。五年進婉儀。六年正月己亥。子坦生。加封貴妃。此至八月而天。先是后與曹美。人俱有寵。自韓后崩。中宮未有所屬。侂胄見后。任權術。而曹美。人性柔順。勸帝立曹。帝以后頗涉書史。知古今。性復機警。竟立之。族兄次山客王夢龍。知其謀。密以告后。后銜之。因與次山謀誅侂。使皇子詢入奏。帝不答。后從傍贊之甚力。亦不答。恐事泄。乃令次山擇廷臣可任者。共圖侂。胄史彌遠。素與有隙。欣然奉命。轉告參政錢象祖。禮部尙書衛涇。著作郎王居安。右司郎官張鉉。皆預其謀。密遣中統制夏震。槌殺之。帝初不知。自此彌遠日貴。用事后親信之。及皇子詢薨。國嗣未定。養宗室子竑爲皇子。與彌遠不相協。陰蓄異志。欲立他宗。子昀。帝大漸日彌遠。遣后兄子谷與石入白廢立。事后不可。

引簡錄
曰皇子先帝所立豈敢擅變是夜凡七往反后終不聽谷等拜
且泣曰今已名昀入宮內外軍民又皆歸心苟不從禍變立至
楊氏且無噍類矣后初不知默然良久名昀入拊其背曰汝今
爲吾子矣遂矯詔廢竑爲濟王立昀爲子卽皇帝位是爲理宗
尊后曰皇太后同聽政以五月十六生日爲壽慶節名所居殿
曰慈明寶慶三年上尊號曰壽明紹定元年復加慈睿四年壽
七十五帝率百官朝慈明殿行慶壽禮加尊號壽明仁福慈睿
大赦賜宰執彌遠等爵秩有差不豫禱于天地宗廟社稷宮觀
赦天下明年崩諡曰恭聖仁烈
理宗后謝氏諱道清丞相深甫孫女帝當立后楊太后德深甫
有援立功特命選之初封通議郡夫人寶慶三年九月進貴妃
十一月冊爲皇后時賈貴妃專寵閹貴妃又以色進后處之裕

如畧不介懷太后賢之帝禮遇益加開慶初元兵渡江議遷都
平江后諫曰恐搖動民心乃止理宗崩度宗立尊爲皇太后加
上尊號壽和聖福立生日爲壽崇節進封三代父魏王祖及曾
祖景之皆魯王后兄奕昌臨海郡王卒贈少保諡莊憲后姪堂
堊墜屋在達皆授節度使宗姻奕修奕實郭自中黃典在及高
平郡夫人謝氏等各封資進秩有差度宗崩恭帝立尊爲太皇
太后年老且疾大臣屢請垂簾聽政彊之乃許以不能御正衙
暫就慈元後殿時兵興費繁痛自裁節汰慈元殿提舉以下官
省泛索錢緡削賈似道官竄之揭榜朝堂不許百官擅遁言天
命未改國法尚存凡在官守與轉一資負國逃者覺察以聞德
祐元年六月朔日食旣削已聖福尊號以應天變時國事以去
張世傑兵敗焦山陳宜中棄官去累名不至后以書遺其母又

親爲書召夏貴等言吾母子不足念獨不報先帝德乎然罕有
至者是月元兵破常州遣陸秀夫等請和不從宜中率公卿請
遷都明日當啓行宮車已駕日且暮而宜中不至太后怒而止
明年正月泣語宜中使軍中日苟存社稷稱臣非所較也宜中
以爲難未幾元兵薄阜亭山宜中宵遁文武百官多引去二月
辛丑大軍駐錢塘降封壽春郡夫人以疾留杭終年七十四
度宗后全氏會稽人知岳州昭孫女理宗母慈憲夫人姪孫女
也性慈順畧涉書史開慶初忠王議婚時相丁大全議京尹顧
嵩女未定大全敗大臣言全女嘗侍其父往返江湖備嘗艱險
其處貴富必能盡警戒相成之道理宗亦以慈憲故詔擇日進
見入宮問其父昔在寶祐間沒於王事每念之令人可哀對曰
妾父可念淮湖之民尤可念也帝異其言辭甚令因語大臣宜

配冢嫡以承祭祀景定二年十一月詔封永嘉郡夫人十二月
冊爲皇太子妃帝訓皇太子夫婦之道王化所基男女正位天
地大義平日所講修身齊家之道當真履實踐勿爲口耳之學
宣付史館永爲世程生恭帝咸淳三年正月冊爲皇后追贈三
代賜家廟第宅弟清夫大中大夫儒科發身乞換武班特授清
遠軍承宣使庭輝以下十五人各轉一官永堅必櫛以下十七
人補承信郎度宗崩恭帝立冊爲皇太后進清夫昭信軍謝屋
保康軍謝至保寧軍皆節度使謝堂檢校少師爲兩淮鎮撫使
與永堅並加檢校少保宋亡從恭帝入朝于燕京後爲正智寺
尼而終

妃楊氏初選入宮爲美人咸淳二年進封淑妃親屬楊幼節以
下百三十四人推恩進秩生建國公昞修容俞氏生昺恭帝降

是走溫州又奔福州眾推為帝妃為太后封昺衛王大軍圍昺海上昺卒昺代立昺復投海死妃聞之大慟曰我聞關忍死以至于此者正為趙氏一塊肉祭祀尙有可望爾今天命至此夫復何言遂赴海死

公主附

太祖女

魏魯陳等主

太宗女

徐揚鄭制等主

仁宗女

周秦堯燕等主

英宗女

楚舒韓等主

神宗女

馬唐潭慶等主

哲宗女

陳國吳國等主

徽宗女

嘉德等帝姬

理宗女

周漢國主

太祖女魏國大長公主開寶三年封昭慶公主下嫁王審琦子承衍賜第景龍門外祥符元年薨謚賢肅承衍字希甫幼端謹善騎射曉音律頗涉藝學好吟咏署父牙職補內殿都知授右衛將軍駙馬都尉領恩州刺史加防禦使太平興國初遷應州

觀察使累檢校太保彰國軍節度使出知天雄軍時契丹擾鎮陽候騎至冀州隣境戒嚴承衍鎮以安靜人賴以安為貝冀都部署換節承清護國二軍真宗改河中尹加檢校太尉卒年五十二贈中書令給鹵簿葬謚恭肅子世安世隆世雄世融

魯國大長公主開寶五年封延慶公主下嫁石守信子保吉祥符二年薨謚賢靖保吉字祐之蔭補天平軍衙內都指揮使開寶四年召見賜襲衣玉帶金鞍勒馬拜左衛將軍駙馬都尉領愛州刺史本州防禦朔州觀察使父喪起復授威塞軍節度使雍熙三年出知河陽大名兼兵馬都部署改橫海安國二鎮真宗加檢校太尉保平軍節度車駕北巡為河北諸路行營都部署屯定州景德初求使相李沆執意不許沆薨後始改武寧軍節度使回平章事幸澶淵為駕前東西面都排陣使軍于北門

外東封攝司徒登壇奉俎加檢校太師還鎮卒年五十七贈中書令諡莊武保吉姿貌瓌碩有武幹性驕倨所至峻暴好殺待屬吏不以禮子貽孫崇儀使帶御器械孝孫西京左藏庫使陳國大長公主初封永慶公主嫁魏仁溥子威信景祐三年薨諡貞惠咸信字國寶太祖居潛邸憲太后嘗至仁溥第咸信方幼侍母側儼如成人太奇愛之欲結姻好開寶中因成太后之意選授右衛將軍駙馬都尉真宗北巡以爲具冀行營都部署卒年六十九贈中書令生子賜名昭亮字克明初授如京副使進東上閣門使上言閣門儀制未備詔與陳彭年張知白同加詳定遂與彭年欵昵嘗稱其材能居官務曠察多遣人偵伺僚輩人以此少之餘慶供備庫副使

太宗女徐國大長公主太平興國九年封蔡國公主下嫁吳廷

祚子元辰字君華初授左衛將軍駙馬都尉領愛州刺史本州團練使雍熙三年表求試郡命知鄆州尋改河陽領鄆州觀察使主疾召還淳化元年主薨復任五年秋霖河溢城壘將壞元辰躬涉泥滓督工補塞以舟楫濟民設餅餌食之所部獲安真宗換安州觀察使知澶州運使劉錫上其治狀詔書嘉獎遷寧國軍留後知定州值王超王繼忠與遼人戰領兵踰唐河元辰急發州兵護河橋旣而敵果來乘見有兵引去歲旱虔禱澍雨沾洽吏民詣闕表請立碑景德三年代歸授武勝軍節度使命修諸陵分領澤潞晉絳磁隰威勝七州軍戎事東封加檢校太傅知徐州祀汾陰改領山南東道被疾卒年五十帝甚悼惜贈中書令諡忠惠元辰性謹讓有憂民心待賓佐以禮喜讀春秋左氏聲色狗馬一不介意族屬至多薦其堪祿仕者自餘親舊

孤貧皆均俸贍之公主亦有德行時乳媪入參宮禁慮其去後
妄有請託白上拒之真宗深所嘉嘆獨稱其賢諡曰英惠授子
守禮六宅使累澄州刺史和州防禦使守嚴守良皆內殿崇班
守讓閤門祇候天禧中又錄孫承嗣承緒並爲殿直
楊國大長公主至道三年封宣慈長公主下嫁柴禹錫子宗慶
賜第普寧坊帝命主以婦禮謁禹錫固辭不許明道二年薨諡
和靖宗慶字天祐初授右衛將軍駙馬都尉領恩州刺史真拜
康州防禦使改復州從祀汾陰爲行宮四面都巡檢使進泉州
觀察武勝軍留後彰德軍節度使仁宗徙靜難永清二軍拜同
中書門下平章事又徙節武成軍出知陝州判鄭州以縱部曲
擾民召還奉朝請卒贈中書令諡榮密
鄭國公主至道三年初封賢懿長公主下嫁王溥孫從子行孜

名貽永景德元年薨諡懿順景祐三年追封雍國大長公主貽
永字季長性清慎寡言頗通書不好聲技咸平中授右衛將軍
駙馬都尉從封泰山領高州刺史轉右監門衛大將軍獎州團
練使外補知單州真宗戒以和衆靜治卿所當先真拜洛州團
練懷州防禦使知檀定二州徙成德軍奏曹汭之變遷耀州歷
彰化武定軍觀察留後安德保寧等軍節度使知天雄軍移鄆
州鄆自咸平中徙城故治爲通衢介梁山春夏多水患貽永相
度地勢築東西道三十餘里民甚便之後移定州及成德軍康
定初召同知樞密院事慶曆五年改副使加宣徽南院使進樞
密使久之拜同中書門下平章事加兼侍中徙節鎮海彰德累
疾求罷遣醫診視稍間召入賜五日一朝命其子西上閤門使
道卿扶掖升殿仍許休殿側至和初拜尚書右僕射皆故事所

無在樞密十五年能遠權勢迄無過失性清謹歸第杜門謝客
人稱謙靜終檢校太師景靈宮使贈太師中書令諡康靖
荆國長公主幼善女功及長性儉約號知禮真宗改封萬壽公
主下嫁李崇矩孫遵勗賜第永寧里所居堂甃及瓦甃多爲鸞
鳳主悉令鑿去服有龍飾悉屏藏之帝聞歎美後遵勗守許州
得暴疾主不待報率從者竟往居喪哀毀循禮服除不御華麗
常曲燕帝親爲簪花辭曰誓不爲此久矣兼善筆札喜圖史能
爲歌詩誠諸子守忠義無恃吾以速悔尤目病喪明帝與后妃
以下皆至第候問帝親爲臥之曰先帝伯仲之籍十有四人今
獨存大主倘疾可移於朕亦所不避也臨歿隱几冲淡自若遺
誠諸子遵父遺命無藏金玉以葬薨年六十四帝臨奠五輟視
朝追封齊國大長公主諡獻穆遵勗字公武生數歲相者謂當

以姻貴少學騎射馳冰雪間馬逸墜崖下衆謂莫救徐起亡恙
及長好文辭舉進士祥符間召對便殿授左龍武將軍駙馬都
尉領澄州刺史坐私主乳母謫均州團練踰年起爲太子左衛
率府副率真拜康州團練使父繼昌守涇州暴感風眩遵勗不
俟命馳省帝遣使乘驛赴之還遷澤州防禦宣州觀察使求試
郡出知澶州賜宴長春殿會河溢將壞浮梁督工治隄七日而
成授昭德軍觀察留後寧國軍節度使徙鎮國軍知許州校按
水軍多不練習劾去十八嘗以疾援唐韋嗣立故事求山林號
詔不許章獻臨朝問以外事不答固問之曰人言上旣冠宜以
時還其政太后曰我非戀此但帝少內侍多恐未能制之爾因
進三說五事以論時政太后乳母晉國林夫人多干外事太后
崩遵勗密請置之別院出入伺察以厭服衆論其居第園池冠

引簡錄 卷一百七十二
于京城嗜奇石構堂引水環以佳木延名士大夫與宴樂師楊
億爲文億卒爲制服與劉筠友善存恤其後通釋氏學將死與
浮圖楚圓爲偈頌卒贈中書令諡和文有閒宴集二十卷外館
芳題七卷

仁宗女周陳國大長公主初封福康公主幼警慧性純孝帝嘗
不豫主侍左右徒跣顙天乞以身代帝隆愛之帝念章懿不及
享天下養因擇尚其兄子李瑋以爲駙馬都尉瑋質朴陋與主
積不相能所生母又忤主意嘗中夜扣皇城門入訴願自還宮
瑋皇懼自劾罰金後數年復不協詔落駙馬出知衛州反主禁
中司馬光言陛下追念慈恩今乃使母子離析家事零落獨無
雨露之感乎且瑋旣出主安得無罪仁宗悟降主沂國復伉儷
如初仍復都尉積官濮州團練安州觀察使復因奉主亡狀貶

柳州團練使陳州安置遇赦還京治平四年進主楚國薨年三
十三神宗命諡莊孝瑋後官建武軍節度使檢校太師卒哲宗
臨奠哭之贈太師中書令

秦魯國大長公主嘉祐五年初封慶壽公主進惠國治平四年
進魯國下嫁吳越忠懿王曾孫錢景臻爲右領軍衛大將軍徽
宗朝進秦魏兩國政和三年更封令德景行大長帝姬以先朝
女金人不知留于汴建炎初至揚州朝謁復避地之閩紹興三
年仍還會稽入見因留居焉時以行尊年高帝甚敬之每入見
必先揖三子忱愜愷俱非主出主獨厚于忱先是靖康中戚里
例納節及是得請授忱瀘州節度使久之又請優賜推恩上重
違之加開府儀同三司上因戒曰長主壽考如此乃仁宗皇帝
深仁厚澤所鍾待遇諸于宜法先朝用心均一主感服薨年八

十輟朝五日駕幸臨奠諡曰賢穆加諡明懿封景臻會稽郡王
忱字伯誠神宗賜名帝嘗諭景臻主賢宜有後為擇嘉配乃
娶晁迥外孫唐介孫女忱從二家遊又伯父勰在翰院因得識
一時名卿哲宗愛之常令侍左右御書忠孝之家四字賜之紹
興十五年長主終喪除少保封榮國公卒年八十贈太師恂官
至太尉開府儀同三司

兗國大長公主嘉祐六年初封永壽公主熙寧九年改封魯國
長公主下嫁曹彬曾孫詩為左領軍大將軍主性儉節居第池
臺苑園一無增飾主生日曹族將盛具為壽主言時方大早上
損膳徹樂吾何心能安悉命屏之元豐六年薨年二十四諡賢
懿

燕舒國大長公主嘉祐六年初封寶壽公主治平二年進冀國

長公主下嫁開州團練使郭獻卿政和二年薨諡懿穆

英宗女魏楚國大長公主嘉祐八年初封德寧公主治平三年
進封徐國長公主下嫁王審琦曾孫師約元豐八年薨追封燕
國大長公主諡惠和師約字君授少習舉業英宗欲求儒生為
婿命宰相名師約因獻所為文賜對選為駙馬都尉授左衛將
軍賜玉帶又賜九經筆硯勉之進學神宗拜嘉州刺史遷成州
團練使始令越例同管當三班院試其才遷汝州防禦使考績
轉晉州觀察使哲宗遷鎮安軍節度觀察留後屢上書宣仁后
元符初以越職褫其秩徽宗復保平軍留後樞密都承旨卒年
五十九主生子殊至閬州觀察使

魏國大長公主嘉祐八年封寶安公主神宗立進舒國長公主
下嫁王全斌五世孫詵字晉卿能詩善書授左衛將軍駙馬都

引簡錄 卷一百一十二
尉詵母盧氏寡居主處之近舍日致膳羞盧病自和湯劑以進
帝厚於姊妹居第池藥服翫極其華縟主以不得侍宣仁於寶
慈宮居常悒然間遇早暵亦從帝降損以禱曰我奉賜皆出公
上固應同其休戚帝居慈聖喪毀甚主云與上同體視此復何
聊賴亦散遣歌舞三十輩平居不妬忌詵得自恣常貶官帝命
復之以慰主意元豐三年疾篤太后臨問慟哭帝繼至自爲診
脈親持粥飲之主強爲盡食問所須但謝帝復詵官薨年三十
主好讀古文章喜筆札調恤族黨中外惜之輟朝五日累改泰
荆魏三國主諡賢惠詵後官至留後

韓國大長公主始封壽康公主改祔衛兩國熙寧元年選尚張
敦禮授左衛將軍駙馬都尉俄遷密州觀察使元祐初上疏言
變法附會之害進武勝軍留後章惇以爲其毀先烈譽司馬光

留後授左千牛衛大將軍勒止朝參徽宗立復和州防禦使
進保信軍留後寧遠軍節度使徙雄武卒贈開府儀同三司主
宣和五年薨加秦越楚三國主

神宗女周國長公主母欽聖太后也主生而警悟羈卯習嗜宛
如成人年十二卒 唐國長公主始封淑壽公主神宗念韓琦
功德欲與爲婚後哲宗緣帝意以主降其子嘉彥加瀛海軍承
宣使主歷封溫曹冀雍越燕六國政和六年薨 潭國長公主
母曰宋貴妃始封康國公主紹聖四年下嫁王遇大觀二年薨
歷韓魯陳鄆四國諡曰賢孝 徐國長公主始封慶國公主進
益冀蜀徐四國年及笄猶處聖瑞宮侍母欽成后疾晝夜不暫
去藥餌非平和弗以進迨疾革號慟屢絕左右不忍視崇寧二
年下嫁潘美曾孫意事姑修婦道潘故大族夫黨數千百人贊

接皆盡禮無中外言志向冲淡服玩不為紛華歲時簡嬉遊十年間惟一適西池而已政和五年薨年三十一追封賢靜長帝

姬 哲宗女陳國公主始封德康公主大觀四年下嫁石端禮歷瀛

榮陳三國政和七年薨 吳國長公主始封康懿出降潘正夫常助時相紹述靖康中亦

以先朝女得留建炎初避地至婺州入見高宗奏祖宗以來駙

馬皆除使相今正夫歷事四朝在汴京曾建議迎陛下至杭又

言禁衛未集宜防變乞除開府不許八年再入見留宮中三日值煩暑上每正衣冠對之飲食時趙鼎當國頗抑正夫鼎去

位始除開府儀同三司檢校少傅封和國公卒贈太傅隆興二年主薨諡康懿子溫卿長卿端卿並授承宣使清卿容州觀察

使墨卿才卿團練使其盛如此 徽宗女三十四早亡十四未嫁十政和五年改公主號為帝姬

國號易以美名曰嘉德帝姬下嫁曹寅榮德帝姬下嫁曹晟安

德帝姬下嫁宋邦光茂德帝姬下嫁蔡條崇德帝姬下嫁曹湜

成德帝姬下嫁向子房洵德帝姬下嫁田丕顯德帝姬下嫁劉

文彥順德帝姬下嫁向子展俱授左衛將軍駙馬都尉後皆北

遷獨恭福帝姬生纒周晬不行後亦薨其在五國城柔德帝姬適徐還紹興十一年薨後有開封尼李靜善貌似柔福即自冒稱上遣內使馮益等驗視以為真遂封福國長公主適永州防禦使高世榮至顯仁太后歸始知其妄伏誅追封和國長公主榮德至燕京駙馬卒改適習古國王紹興中有商人妻易氏在劉超軍中亦冒稱之鎮撫使解潛送至行在遣內夫人辨驗其

弘簡錄卷一百七十三

明刑部員外郎仁和弘齋邵經邦學

皇清翰林院侍講學士四世孫遠平校閱

系屬 宋八之一

太祖弟廷美

子德恭 德隆 德夔 德雍 德鈞
德欽 德澗 德文 德愿 德存
孫叔近 彥倓 彥逾

子德昭

孫惟正 惟固 惟忠 惟和
令時 令應 令衿 令誤
子砥 子直 子崧 子櫟 子晝
子砥 師弄 希釋 希言 與愿
孫惟敘 惟憲 惟能 子備 伯圭
師夔 師揆 師禹 伯玖

次德芳

太祖兄光濟弟光贊俱早亡後追封光濟邕王改曹王光贊夔

王改岐王廷美最幼初名光美字文化建隆初授嘉州防禦使

明年遷興元尹山南西道節度使乾德二年加同中書門下平

章事開寶六年檢校太保侍中京兆尹永興軍節度使太宗卽位爲開封尹加中書令封齊王子並稱皇子女稱皇女尋檢校太師扈駕親征太原久乃論功進封秦王太平興國五年親征契丹命留守東京會有告其驕恣將有陰謀竊發者帝不忍暴其事罷尹開封徙爲西京留守行後賞告密功以王通判河南府閻矩判留守事柴禹錫楊守一皆遷官又併坐交通及嘗受宴犒者落左衛將軍樞密承旨陳從龍爲皇城使右衛將軍劉知信弓箭庫使惠延真商州長史并責禁軍校皇甫繼明王榮等削籍配流及趙普再相又奏虛多遜交通事言已實與昭憲顧命後爲權倖所沮在先朝時已嘗自愬上乃於宮中訪普前所上章并發金匱誓書因訪以傳國之意普曰太祖已誤陛下豈容再誤邪於是廷美遂得罪會多遜事發下御史捕繫中書

守堂官趙白坐與王府吏樊德明遊處因之交結秦王爲多遜往來傳語言皆指斥宮車又秦府孔日閻密驕橫不法小吏王繼勳尤親信王嘗使訪求聲妓怙勢賊污趙懷祿弟廷俊爲軍器庫使王私名與語閻懷忠爲王請錢俶求犀玉帶金酒器又遣齋銀盃錦綵羊酒賜伊妻父御前忠佐馬軍都頭潘潏至是皆伏誅勒廷美歸私第改正王男女名仍稱皇侄女去公主號降駙馬韓崇業爲右千牛衛率府率並發遣西京居住貶秦府官屬閻矩孫嶼爲涪融二州司戶叅軍普復以謫居西洛非便令知開封李符上言王不悔過乞徙遠郡以防他變詔降爲涪陵縣公房州安置削妻張氏楚國夫人諸子悉從普又恐符言泄坐他事流死春州命崇儀使閻彥進知房州御史袁廓通判州事伺察秦王各賜白金三百兩自此憂悸成疾雍熙元年卒

年三十八追封帝王謚曰悼上對宰相曰廷美自少剛復長益凶惡朕以同氣至親不忍寘之於法俾居房陵冀其思過方欲推恩遽茲殞逝痛傷柰何爲發哀成服其母陳國夫人耿氏亦薨上又對侍臣言陳國卽朕乳母後嫁趙氏生廷俊朕令屬韃左右輒漏泄禁中事於廷美邇者西池水心殿成橋梁未備朕將泛舟以往廷美與左右謀欲以此時竊發不果卽詐稱疾俟朕臨省因復爲變社事如此朕不欲暴揚言已愴然昉等對曰涪陵悖逆天下共聞若此事非陛下親示臣等何由知之真宗立與妻追復官封咸平二年詔擇地改葬汝州梁縣之新豐鄉仁宗贈太師尚書令徽宗改封魏王子十人德恭字復禮初以皇子出閣授貴州防禦使免官從徙房陵後授峯州刺史德隆漢州刺史雍熙中詔德恭爲左武衛大將軍封安定郡侯判

濟州德隆爲右武衛大將軍長寧郡侯判沂州令高昌衛紹欽送諸弟皆隨赴治所常俸外歲給錢三百萬命起居舍人韓檢右補闕劉蒙叟分任二州通判諭以盡誠裨贊苟有闕失止罪爾等端拱元年進封德恭安定郡公改左驍衛左神武大將軍真宗改樂平郡公判虢州遷勝州團練衛州防禦使卒年四十五贈保信軍節度使追封中國公明道二年追封高密郡王謚慈惠二子長承慶次承壽承慶父病剖股官至和州團練使卒贈武信軍節度使循國公子六人克繼善楷書尤工篆隸訓子弟力學登科者十有二人嘗進所集廣韻字源仁宗稱善終定武軍節度觀察留後贈開府儀同三司建國公謚章靖承壽終南作坊使贈德州刺史武當侯子四人克巳曉音律書學虞世南嘗作樂曲并獻雅樂圖侍宴大清樓賜器加等終右千牛衛

大將軍贈深州防禦使饒陽侯克巳子叔韶字君和勤於爲學
仁宗命臨真宗御書選第一皇祐初進所爲文召試學士院賜
及第自太子右監門率府副率遷右領軍衛將軍入謝命坐賜
茶并賜九經諭曰宗子好學者多若爾者鮮遷右屯衛大將軍
至和中求試煩劇領賀州刺史終和州防禦使贈鎮東軍節度
觀察留後會稽郡公克修字子莊仁宗爲皇子侍學禁中待遇
殊厚授右神武軍大將軍成州團練使早卒贈同州觀察使馮
翊侯克脩子叔克藏書萬卷撫視異母弟叔瑁誨救成人又請
封其繼母遂爲定制卒官唐州防禦贈崇信軍節度使尹國公
諡孝齊子九人登科者三撫之正任刺史遺表祈任子如外官
法詔從之自此宗室正任始有遺恩 德隆字日新卒官沂州
守年二十三贈寧遠軍節度使追封臨沂郡公天禧三年加贈

崇信軍節度使同平章事廣平郡王子承訓官至順州刺史卒
贈深州團練使 德夔字可久自幼太祖鞠於宮中長授右千
牛衛大將軍封長寧郡侯年十九代德隆判沂州飛蝗入境責
躬引咎齋戒致禱蝗多自殪辨儒生乙恕寃進封郡公淳化四
年爲右監門衛遷左武衛二大將軍改判廣平部民請闕乞留
詔嘉獎真宗召還命判滁州咸平中遷累徐州刺史保信軍節
度觀察留後卒年四十九上臨奠廢朝贈昭信軍節度使追封
信都郡王諡安簡明道二年改封潁川郡王子承矩終莊宅使
贈博州刺史承勗至供奉官贈六宅副使承範承拱並西京作
坊使承衍內殿崇班承錫供奉官 德雍字仲達淳化初授右
驍衛將軍歷右羽林龍武二將軍累遷蔡州觀察使咸寧郡公
終天平軍節度觀察留後贈宣德軍節度使同中書門下平章

事諡康簡明道中追封廣陵郡王子承亮襲封昌國公神宗拜
 感德軍節度使改封秦國公奉祀薨贈樂平郡王諡恭靜子克
 渝嗣卒子叔牙嗣承睦終左領軍衛大將軍彭州團練度州觀
 察使南康侯 德鈞字子正性和雅善書翰好為篇什淳化初
 拜右武衛將軍四遷至右衛將軍景德二年加右監門衛大將
 軍卒贈河州觀察使鄖國公子承簡襲封徐國公官至保康軍
 留後贈彰化軍節度使安定郡王諡和懿承緒供奉官承偉承
 雅承裔承鑑承則並西京作坊使承裕禮賓副使承翊內殿崇
 班承幹終懷州防禦使贈保靜軍節度使蕭國公子克敦父子
 以經術文學名于宗藩宗正薦名試中選元豐間又集父遺文
 以進神宗賜詔獎諭追封承幹為東平王克敦終宣州觀察使
 贈開府儀同三司和國公 德欽字不從淳化元年授右屯

將軍四遷右羽林將軍卒年三十一贈雲州觀察使追封雲中
 侯子承遵西京作坊使 德潤字溫玉頗好學善為詩淳化元
 年授右領軍衛將軍四遷右羽林大將軍卒年三十九贈應州
 觀察使追封金城侯 德文字子石淳化初授右監門衛將軍
 累遷滑州觀察使馮翊郡公少好學刻勵如諸生手抄經史百
 家工為辭章真宗呼為五秀才封泰山祀汾陰幸亳皆奏賦頌
 帝每賜詩輒令屬和特命楊億與相師友億卒悼以詩十章天
 聖中遷橫海軍節度觀察留後歷昭武感德武勝三軍節度使
 加同中書門下平章事仁宗以德文大父行且賢稱為五相公
 不名慶曆四年進封東平郡王加兼侍中雖老嗜學不倦有疾
 上臨視親調藥飲薨年七十二駕往臨哭贈太尉中書令加封
 申王諡恭裕子六承顯襲封康國公終昭化軍節度使年七十

四贈太尉樂平郡王 德愿字公謹淳化初授右千牛衛將軍
至左武衛大將軍卒年二十四贈京州觀察使姑臧侯 德存
字安世九歲授右千牛衛將軍歷監門至驍衛從祠泰山領樊
州刺史祀汾陰遷左羽林大將軍卒年二十贈洮州觀察使洮
陽侯子承衍禮賓副使 元孫叔近榮良公克類子建炎元年
守秀州值杭卒陳通反詔辛道宗將西兵討之兵潰爲亂抵秀
城下叔近乘城諭以禍福乃去未幾差權兩浙提刑招通聽命
及入城猶不解甲叔近置酒推誠待之遂皆感服因奏通初無
叛心緣葉夢得給賞不時遂至紛爭今已就招請赦其徒二百
餘人帝許之已而王淵兵至杭許呼趙秀州來給通郊迎遂誅
之淵初在汴狎娼周氏銜叔近私之誣以通賊奪職被拘代者
朱芾肆殘虐軍民怨憤小卒徐明率衆囚芾迎叔近領郡事奏

上未達朝命淵部曲張俊致討領兵至叔近出迎俊叱令置斃
方操筆未竟斬首于地明等遂反戈嬰城縱火驅掠俊捕誅之
取周氏以歸于淵紹興九年御史訟其寃贈集英殿修撰 彥
倓字安卿彭城侯叔聚曾孫饒州太守公廣之子初調溧陽尉
彖民潘氏兄弟號三虎彥倓按治之皆正其罪改揚州司戶攝
獄掾有告主藏吏匿錢千萬彥倓察其情實諸吏共貸者許以
自首免罪一日而畢改平江推官攝宜興縣自軍興百凡預借
民得挾此慢易其令彥倓請禁之邑遂易治擢知於潛執黥胥
滑吏不得與臺省吏通積弊遂息陞通判臨安開禧初知興國
軍時歲旱蝗軍需益急令吳格方負上供銀貶秩彥倓謂宜寬
民力以崇根本有潰卒斬之散其餘黨累遷湖南運判穽人羅
孟傳反帥從彥倓計遣謀者離其黨與俾還自相讐卒降之尋

知紹興患楮價輕權之以法民稱其便復鹿鳴禮置興賢莊以資費築捍海石塘亦置莊以備增築旱饑第民高下差損賦稅免輸湖籍田米舉緡錢四十萬以助荒政賴濟者衆擢太府少卿直顯謨閣知太平調江西轉運使卒于官年六十四 彥逾字德老崇簡國公叔寓曾孫登進士擢知秀州累遷大府少卿四川總領初入境安丙來迓從容問挺衆六萬多有虛籍丙以情告俾悉簡損以寬民賦挺不敢隱改知鎮江適旱饑節浮費發粟振糴民賴以濟遷戶部侍郎工部尚書殿帥郭杲嘗被誣彥逾爲白于帝故杲與彥逾善趙汝愚遣中郎將范任告杲立嘉王事杲不應任以告彥逾乃大喜力贊決策馳語杲曰樞密第能謀之太尉爲國虎臣當任其責杲未及對彥逾急責之杲許諾領兵爲衛遂協濟大計寧宗卽位冀引已共政汝愚謂我

輩宗臣不當言功以爲端明殿學士出知建康兼江東安撫使意殊舛望未行改四川安撫置制使兼知成都凡兩人蜀政皆不擾人有聲譽蜀人安之侂胄論前功累遷資政殿大學士嘉泰間知明州兼沿海制置使乞祠卒議者以嘗奏復利西安撫吳氏兵權後致曦變多以爲咎

太祖四子長滕王德秀次舒王德林皆早亡次德昭字日新乾德二年冲幼出閣領貴州防禦使開寶六年改興元尹山南西道節度使檢校太傅同中書門下平章事太平興國元年兼侍中爲京兆尹授永興軍節度使封武功郡王朝與齊王廷美同班宰相上三年二月娶太傅王溥女封韓國夫人冬郊加檢校太尉四年從太宗征幽州軍中嘗夜驚不知上所在有謀立之者上聞不悅及歸以北征不利故久不行太原賞德昭以爲言

上怒曰待汝自爲之賞未晚也德昭懼退而自刎上聞驚悔往抱其尸哭曰癡兒何至此耶贈中書令追封魏王諡曰懿真宗贈太傅改封吳王乾興初加太師又改封越子五人惟正蚤有疾爲保信軍節度觀察留後封樂安郡公卒贈侍中追封同安郡王諡僖靖無子以惟忠子從讜嗣從讜官至左龍武大將軍溫州團練使少好學以剛褊廢贈濟州防禦使濟南侯惟吉字國祥母鄭國夫人陳氏孝章后與太祖皆愛之夜啼必自起撫抱稍長日令誦讀作弱弓輕矢射以金錢爲的常乘小車黃門擁抱出入太祖崩裁六歲晝夜哀號后慰諭始進粥賜以帝后畫像服玩器用歲時奠享哀慕甚至宗室稱其賢太宗卽位猶在禁中日侍食太平興國八年出居東宮授左監門衛將軍封平陽侯加左驍衛大將軍安定郡公淳化四年遷左羽林

衛大將軍閬州觀察使凡邸第供億車服賜予與諸王埒自餘王子不得偕也真宗授武信軍節度使加同平章事封泰山改感德軍有疾上屢臨省親視灼艾給御膳且爲佛事薨年四十五廢朝贈太尉中書令諡康孝天性好學善屬文工草隸飛白真宗次爲七卷御製序命藏祕閣明道二年追封冀王七子守節累遷彰化軍節度觀察留後同知太宗正事卒贈鎮江軍節度使追封丹陽郡王諡僖穆子世承襲邢國公終鎮南軍留後贈昭信軍節度使南康郡王諡修孝世延終右武衛大將軍絳州防禦使贈武寧軍節度觀察留後彭城郡公守約終內園使康州刺史贈沂州團練使子世靜至左武衛大將軍均州防禦使贈鎮海軍節度觀察留後北海郡公世長終左武衛大將軍解州防禦使贈彰信軍節度觀察留後濟陽郡公守巽慶曆十

年襲封官至和州防禦使贈武成軍節度使楚國公子世清累
官茂州防禦使封申國公熙寧中遷越州觀察使襲懿王後封
越國公進會稽郡王至保信軍留後愛諸弟作棣萼會於邸中
元豐中升祔四后受命告廟方疾力就事薨贈安化軍節度使
開封儀同三司封號王諡恭安子令廓嗣守度終左領軍衛大
將軍英州團練使贈廣州觀察使廬江侯守廉終供備庫副使
贈內藏庫使守康至供奉官 惟固字宗幹初名元辰賜改今
名授左千牛衛將軍昌州團練使卒子從信封楚王諡安僖子
二世福官至集慶軍節度使薨贈儀王世逢封益國公子令應
見後 惟忠字令德初名文起賜改今名授右千牛衛將軍四
遷右龍武軍左監門衛大將軍敘州刺史終昌州團練使贈鄂
州觀察使江夏侯明道二年加贈彰化軍節度使舒國公十八

人從恪累官西染院使卒贈磁州刺史東萊侯子世規襲封崇
國公官至右龍武大將軍沂州防禦使從藹襲封潁國公終左
衛大將軍齊州防禦使贈武勝軍節度觀察留後追封韓國公
子三人世豐終太子右衛率世準爲人內恕外嚴無綺羅金玉
之好比郊廟必從累授金州觀察寶靜軍節度使薨年六十八
贈開府儀同三司追封成王世雄少力學知名與子令鑠熙寧
中應詔皆以材能表見嘗請營都宅以處疎屬立三舍以訓學
者詔用其議置兩京敦宗院六宮各建學徽宗拜崇信軍節度
使知大宗正事崇寧四年薨年七十五贈太尉追封淄王諡恭
憲令鑠官至寶文閣待制子子洳見後從信初封榮國公官至
雄州防禦使贈保寧軍節度使楚國公諡安僖從秉從穎並禮
賓使從謹宜城侯見後從質內殿崇班從謹出繼 惟和字子

禮歷龍武將軍領澄州刺史終右千牛衛大將軍年五十六贈汝州防禦使臨汝侯明道二年加贈永清軍節度觀察留後追封清源郡公雅好學爲詩清麗工筆札優游典籍以禮法自居宗室推重仁宗對王且稱爲皇族之秀錄其藁二十二軸親製序藏于祕閣子年從審終復州防禦使贈寧國軍節度觀察留後宣城郡公坐帷簿除名從誨終左金吾衛大將軍台州團練使贈襄州觀察使襄陽侯子世開七八歲日誦萬言既長學問該洽事後母孝撫孤姪如己子宮官吳申薦其學行命試學士院神宗褒異之名對便殿言宮僚缺當卽補不當以他官攝使私謁公行宗女當嫁宜銓擇不當以貨取使富室濫冒帝嘉納著爲令官至奉國軍留後贈開府儀同三司追封信王謚獻敏先是熙寧中詔封太祖後爲安定郡王奉太祖祀世世勿絕

首封秦王孫從式已而更封燕王曾孫世準薨世開嗣薨世雄嗣薨世福嗣薨令盪嗣薨令庇以年長爭襲朝廷從禮部郎王居正言燕王太祖長子正當襲封令庇小宗不與之並議遂定自宣和末停封至紹興初令詒始得襲授寧州觀察使右武衛大將軍薨贈開府儀同三司自此至嘉定襲封者十五人惟四人迹頗著餘皆媸媸無聞 令峙字德麟蚤以才敏聞元祐六年簽書穎州公事蘇軾嘗薦于朝及軾被竄坐交通罰金已而附內侍譚稹以進頗違清議紹興初官至右朝請大夫改右監門衛大將軍榮州防禦使權知大宗正事遷洪州觀察使終寧遠軍承宣使贈開府儀同三司 令虹由邵武軍兵馬都監襲封授華州觀察使除同知大宗正事 令憲字深之授右班禁直遷東頭供奉官累監州縣場庫薛昂薦其才易承事郎累穎

州簽書綿州通判歷知慶源府召除衛尉少卿擢秘閣修撰建
炎二年分西外宗子於泰州命知其事旋除御營司參贊軍事
挈宗子避地福州因置司焉尋改集英殿修撰閩州觀察使同
知大宗正事遷鎮東軍承宣使終保平軍節度使年七十五贈
少師追封惠王諡襄靖子子游官至湖北提刑王侯薦直秘閣
知南外宗正司宗官用文臣自茲始 令矜嘉孝穆公世峽子
博學有文舍選中等除軍器少監以言事忤旨屢奪官紹興七
年召爲都官員外郎知泉州建祠合祀隱士秦系唐相姜公輔
郡人感其化爲檜黨所訴誣以謗訕朝政追一官勒停者十餘
年檜死起爲秘閣修撰知合州徙紹興權戶部侍郎尋知慶遠
軍承宣使薨贈開府儀同三司 令諱字君序初補右班殿直
遷承忠郎召試授從事郎復試舍選合格授宣教郎調信州水

豐縣丞累遷福州運判兼提點刑獄領嚴饒二州鑄錢局請以
所積兵匠缺籍衣糧付諸監省朝廷降銅木錢又州縣所賣官
田計所入高下守令進秩減磨勘有差義倉紅腐請歲出三之
一以易新粟水旱爲災檢放不及七分處所卽許振恤皆從之
隆興初同知大宗正事奏減生日支賜并郊祀賞給以助軍興
詔褒之遷敷文閣直學士特授左中大夫知紹興府引疾乞祠
歸薨年六十八生平蒞事明敏有丰采然在閩日與副使章菱
不協陰中以法陷於死世以此少之 令德乾道元年爲武德
郎授定武軍承宣使薨武德郎令檣襲除金州觀察使薨武翼
郎子棟襲薨忠訓郎子彤襲授容州觀察使薨年八十餘慶元
元年忠翊郎子恭襲授利州觀察使薨嘉定二年子覲襲授益
州觀察使薨嘉泰四年伯栩襲授宣州觀察使薨嘉定元年伯

祝襲授福州觀察使。堯八年，伯澤襲授潭州觀察使。子澹，字正之，幼警悟。蘇軾語其父曰：「此公家千里駒也。」及長，善談論。工詩，初蔭補承務郎，累遷少府監。河南少尹時治西內事，有未便，輒力爭。潛使宋昇器之改容以謝，除蔡河撥發綱運官。會旱涸，轉餉後塆，貶秩。復提舉三門白波輦運事，除直秘閣。內艱起，復累進龍圖秘閣，修撰。除陝西運副，民病蔡京夾錫錢壅滯，子澹請鑄小鐵錢以權之。範格以進，徽宗御書宣和通寶四字爲文。旣成，奏許民以舊易新，旬日得銅錢百餘萬緡。御札復行新錢，五路均糴，細麥命領其事。時苦限迫，子澹請寬其期，民以爲便。京再相，言者希意論其亂錢法，落職奉祠。居洛，靖康初復修撰，因避金禍，奔于荆南。值潰兵祝靖盛德，破城，子澹匿民家。靖等來謁，言京城已被，子澹泣語之曰：「君輩宜亟還都城，護社稷。」

取功名無徒煩擾州縣，皆應曰諾。因草檄趣之，翼日靖等遂北。紹興元年，召見除徽猷閣直學士，知西外宗正司。俄遷江西都轉運使，會建督府，軍須浩繁，運餉不絕，以功進寶文閣直學士。三京新復，改京畿都轉運，以疾卒。年六十七。爲人有幹材，然崇寧大觀間，土木繁興，每令董役不辭識者鄙之。同時五世孫子崧，字伯山，登進士官至宗正少卿。徽猷閣直學士，知淮寧府。汴京失守，以書白康王，遂與知穎昌何志同等結盟，傳檄中外。諸路時朝命隔絕，凡有事宜，並取大元帥府裁決。已而引兵趨襄邑，遣范瑗、徐文忠勸進王命。子崧京帥府參議官，東南道都總管，移書責張邦昌速宜反正。其家在廬州，檄通守趙令儵幾察之，誅其母子以絕姦心。又遺書責王時雍亡人之國會。邦昌遣使迎王，次第白王請先謁宗廟，覲母后，明正誅賞，降赦四方。

罪宣撫范訥逗撓營私。蠲免被兵州縣租。及經理淮南荆浙形勢之地。毋爲羣盜所據。又上奏隆祐太后曰。諸路先聞二聖北遷。易姓改國。恐有假討逆之名。以竊據州郡者。乞速下明詔。諭四方以迎立康王之意。庶幾人心慰安。奸宄自消矣。尋以所部兵會濟州。王卽位。首請放諸路常平積欠錢。又言臺諫爲人主耳目。近年用非其人。率取旨言事。請遵舊制。聽學士中丞互舉。先朝范祖禹常安民。上官均言事盡忠。請錄其子。帝皆可之。又建三屯之議。一屯澶淵。一屯河中。一屯青鄆間。以張聲勢。萬一敵騎南侵。三道並進。可成大功。除延康殿學士。知鎮江府。兩浙路兵馬鈐轄。復論。王時雍徐秉哲。英拜莫倚。范瓊胡思王。紹王及之。顏博文。余大均等。罪惡望肆。諸市朝以爲臣子之戒。時滑州兩經殘破。薦除傅亮。滑州通判黃潛。善川之賊趙萬。犯

鎮江。調鄉兵乘城爲備。頃之聞官軍敗歸。兵遂驚潰。子崧不得已。率親兵保焦山。御營統制辛道宗與子崧有隙。因錄其曩時起兵勤王檄文。以爲言涉不遜。詔御史往案。帝震怒。不欲暴子崧罪。坐以擅棄城降。單州團練副使安置。南雄卒紹興二年赦。復集英殿修撰。子櫟。登元祐進士。靖康中。歷官守汝州。金人再破荆湖諸州。子櫟獨保境土。李綱言于朝。遷寶文閣直學士。尋提舉萬壽觀。卒。子晝。字叔問。少警敏。強記。工書翰。累官憲州通判。宣和初。克詳定九域圖志。編修官。出知澤。與密州遷刑部員外郎。以憂去。建炎四年。歷吏部左司。兼權貨務。歲收茶鹽香錢六百九萬餘緡。以功進一秩。試太常少卿。集太常因革禮八十篇。爲二十七卷。請復春分祀。高禘禮。權禮部侍郎。遷徽猷閣待制。樞密都承旨。官制改後。始用文臣。久之。知秀州。奉祠歸。

寓于衢卒年五十四子砥令珣子仕至鴻臚丞北遷至燕山
久之遣其徒朱國賓王孝安至中京求得上皇宸翰懷之潛以
遁歸建炎二年六月至行在帝命輔臣召問于都堂言金人講
和以用兵我國歛兵以待和往者金與契丹主和十餘年間遂
遭破滅今復蹈其覆轍譬如人畏虎必設陷穽待之庶能制虎
朝廷不能行命復故官知台州卒師彛字從善從謹五世孫
高祖世恬崇國公曾祖令駿嘉國公中興初韓世清挾以爲變
裂黃旗被其身令駿固拒獲免祖子笈朝奉郎父伯驢和州防
禦使少以文藝侍高宗于康邸師彛登進士歷官司農簿金部
郎中孝宗奇其才顧遇頗厚嘗奏左右曹度支倉部宜立總計
司歸併財物之數以絕吏奸制可除知吉州即山鍊銅補欠額
二十萬進戶部郎官淮東總領光宗初擢太府少卿知秀州改

淮南運判時鐵錢不行鹽商阻滯師彛請發度牒出倉粟以收
鐵錢鹽利遂通累遷司農卿以附韓侂胄得知臨安府有僧號
散卑以妖術惑衆捕治黥之侂胄生日百官爭貢珍異師彛最
後至出小盒侑觴啓之乃粟金蒲萄架上綴大珠百餘顆價值
不貲衆慚沮侂胄愛妾十四有獻北珠冠四以遺四妾其十人
亦欲得之未有以應師彛亟出錢十萬緡市珠製十冠以獻轉
工部侍郎他日飲南園過山莊侂胄顧竹籬茅舍曰此真田間
氣象但欠雞鳴犬吠耳俄聞犬嘍叢薄間視之乃師彛也因大
笑遷爲尚書復知臨安嘗鈎致民罪沒其家貲會將用兵師彛
知侂胄材疎意廣必且名亂遂持異議鄧友龍劾罷之侂胄死
奸黨多謫師彛獨因是復用除寶謨閣直學士知鎮江荆湖始
置閫卽以命之給事中蔡幼學繳駁罷歸未幾復起爲兵部尚

弘簡錄 卷一百一十三
書三知臨安幼學時爲學士亦不草詔留元剛草之師堯治有能聲時楮輕糴貴未數月楮價寢昂糴亦稍平執政愈以爲賢會以事撻武學生柯子冲盧宣德合三學生投牒劾罷與祠卒年七十四公論鄙之 同時八世孫希懌字伯和登進士趙汝愚辟爲屬吏嘗言治人如修身治政如理家愛民如處昆弟取古今官著惠愛者緝爲一編汝愚嘉之薦于辛棄疾辛素尚氣僚吏不敢與可否希懌獨盡言無所避屬邑侯官苦稅重每不登額爲稽公帑羨錢以足之棄疾薦其能調江東運司幹辦同寅有坐侂冑黨者諸司莫敢薦希懌賢其人請以已劾薦之改太平州通判舊例黥盜逃卽處死爲平其法得減死論遷江西茶鹽提舉歲饑惡少聚劫希懌自臨按視發粟賑給捕治其首惡餘黨解散民亦得食遷水路帥兼漕事奸民潛通羅世傳陰

濟以糶希懌重法禁之未幾李元礪寇郴陳廷佐寇南安有何尤世者能知賊動息希懌授以計俾誘世傳誅元礪以自贖廷佐勢孤亦降除知平江移太平習知其民利病損折市價減權酤額以蘇民力乞祠遷端明殿學士換昭信軍節度使開府儀同三司致仕卒年五十八贈少保封成國公 令憲元孫希言字若訥登進士調衢州司戶叅軍守令計合郡民爲表其坊里標其戶數置圖以獻守得而才之時衢已復孔步章戴二場漕帥復檄訪嚴州烏龍嶺稅場希言力陳不當復且謂二場當併罷帥怒然終不能奪未幾果廢改吉州司理歷淮西總所幹辦公事移書約諸郡綱必以時發至卽受納一無滯留始至軍庫見錢不滿千緡比去克溢擢知仁和闢廣學宮大旱蝗驅卒燔之臨平湖決爲築堤捍禦親捧土投石兵民爭奮後不復決民

病和買絹折錢希言爲節公費代輸除大社令遷密院編修兼
右司郎官上言諸將各務城守敵來不拒去不復追異時之憂
始不止保江而已宜諭諸將一軍受圍諸軍出敵務以戰爲守
毋徒自固遷宗正丞請許南班得與輪對歷秘書丞著作郎軍
器少監克密院檢詳凡六年奉祠卒年六十一贈資政殿大學
士封越國公諡忠憲子與權登進士再中刑法科官至開府儀
同三司

寧宗養子詢燕王十世孫初名與愿寧宗旣失克王宰執京鎗
等請養于宮中年六歲賜名曠除福州觀察使嘉泰二年拜武
威軍節度使封魏國公聽讀資善堂開禧元年五月乙亥爲皇
子進封榮王加開府儀同三司用翊善史彌遠計奏韓侂胄輕
起兵端將危宗社宜賜誅殛以安邊境事成立爲皇太子更名

曠上每御朝命太子侍立宰執日赴資善堂會議等用天禧故
事宰輔大臣錢象祖兼太子少傅衛涇雷孝友林大中並兼賓
客太子出居東宮更今名嘉定十三年薨年二十九諡曰景獻
以荊州防禦使乃裕繼其後

次子德芳開寶九年出閣授貴州防禦使太平興國初除興元
尹山南西道節度使同平章事三年加檢校太尉六年薨年二
十三車駕臨哭廢朝贈中書令封岐王諡康惠真宗加贈太保
又進太師改封楚王徽宗改泰王三子惟敘惟憲惟能

惟敘字懋功性純謹頗好學端拱初授左武衛將軍領勤州刺
史從祀汾陰拜左千牛衛大將軍卒年三十五贈懷州防禦使
追封河內侯明道二年加贈保靜軍節度觀察留後高平郡公
子從照慶曆中詔立十王後封安國公終左金吾衛大將軍歸

州團練使贈同州觀察使齊國公從溥至右侍禁內殿崇班
惟憲字有則卽孝宗五世祖也少美丰儀頗縱肆長修謹善射
好吟咏多讀道書端拱初授左屯衛將軍累遷左羽林將軍領
演州刺史加左衛大將軍真拜資州團練使卒年三十八贈安
德軍節度使兼侍中英國公子六人從式襲封舒國公終保康
軍節度使薨贈同中書門下平章事追封榮王諡安僖子世恩
嗣封楚國公遷楚州防禦使卒贈定國軍節度使諡良僖從演
禮賓副使從戒從湜並內殿崇班從賁供奉官從郁封新興
侯子世將封華陰侯世將子令儉東頭供奉官封慶國公令儉
子子偁卽孝宗父子偁宣和初合選合格調嘉興丞召赴都堂
審察改宗教郎通判湖州高宗卽位除直秘閣賜五品服召對
言宗室之寓于外者尚衆請於官舍選尊長鈐束之年未十五

附州小學十五入大學許依進士就舉未官者亦許入學諸續
及二年聽參選上納其說遷朝奉郎以秘閣修撰知處州俄許
奉祠累官左朝奉大夫紹興十三年致仕明年九月丁巳卒于
秀州給錢營葬詔侍從臺諫議普安郡王所服秦熿等請解官
如南班故事普安亦自請持服許之及建節以恩贈太子少師
立爲太子加贈太師中書令封秀王諡安僖配張氏封王夫人
內禪詔稱皇伯夫人爲皇伯母乾道三年三月皇伯母薨帝成
服于後苑百官進名奉慰時園廟制尚未備紹熙元年始卽湖
州秀園立廟奉神主建祠臨安府以藏神貌如濮王故事仍班
其諱子伯圭字禹錫孝宗同母兄以恩補將仕郎調華亭縣
尉累官浙西提刑幹辦公事通判明州受禪除集英殿修撰知
台州頗著政績改敷文閣待制徙明州克沿海制置使有蕃商

死吏請沒入其貲伯圭不可令護喪及貲以歸陞敷文閣直學
士丁憂服闋再知明州新學宮命宗子入學閑以規矩奏定海
當控扼之衝當嚴兵備請摘制司軍以實許浦降海寇葛明禽
其黨倪德二人以功累龍圖閣學士在郡十年政尚寬和浚湖
陂均水利辨冤獄嘗獲鑄錢者不忍寘法諭令易業民無再犯
淳熙三年遷安德軍節度使尋加開府儀同三司克萬壽觀使
朝德壽宮賜玉帶加少保封滎陽郡王高宗崩克攢宮總護使
除少傅光宗陞少師踰年遷太保封嗣秀王賜甲第安僖祠側
諸子並換南班不責史事惟安享富貴紹熙元年判夫宗正事
建請別立宗學以教宗子三年進太師慶元初兼崇信軍節度
使還湖州嘉泰二年薨輟朝三日追封崇王諡憲靖伯圭性謙
謹不以近屬自居每入見行家人禮雖宴私隆洽執臣節愈恭

一日帝問潛龍時事辭曰臣老不復能記憶問至再三終不言
帝笑曰何太謹也益愛重之嘗欲廣其居並湖爲複閣有司度
材固辭而止阜陵成遷中書令凡五讓寧宗嘉其志詔別議褒
崇之禮贊拜不名肩輿至殿門子九人 師夔字汝一以恩初

調蕪湖簿隆興元年改右承務郎歷台秀二州通判直秘閣尋
知徽州新學舍進直徽猷閣知湖州所領歸附從軍者衆時不
能給請增廩仍別給餼屋錢以安其心帝稱善詔諸郡行之除
直龍圖閣遷累浙西提刑江東運判奏建康務塲侵奪民利乞
罷之守臣以郡計所資請復不從池州軍帥霍政與守臣交攻
詔宥曲直師夔具言其狀政坐罷改秘閣修撰知明州兼沿海
制置加敷文閣待制轉永慶軍承宣使紹熙元年侍父入覲除
興寧軍節度使寧宗加檢校少保克阜陵橋道頓遞使陵成遷

開府儀同三司侍父歸薨未踰月亦卒年六十一贈少師追封新安郡王師揆字元輔初補右承務郎奉祠除添差湖州簽判改婺州通判加直秘閣守臣韓元吉薦其材上以問史浩言其聰爽可任名對除江東提舉奏免失陷常平人毋責償改淮南漕尋遷淮西提刑兼提舉領屯田事奏以荒圩給軍士勿奪屯田爲民世業者從之代還吏請獻羨錢二十萬不聽除直秘閣改江東運副秘閣修撰知明州紹熙元年授觀察使寧宗除奉國軍承宣使尋陞節度使召見賜肩輿遷檢校太保開府儀同三司克萬壽觀使襲封薨贈太傅追封和王諡端肅師垂師高師臯師崑師彌師貢俱嗣秀王理宗初師彌爲檢校少保至少師保寧軍節度使紹定六年判

大宗正事淳祐五年詔獎典屬籍職事修舉授太傅加食邑寶祐六年薨師貢奉國軍節度使克萬壽觀使卒惟能字若拙端共初授右屯衛將軍累遷右神武大將軍卒年二十贈蔡州防禦使張掖侯明道二年加贈集慶軍節度觀察留後南康郡公子三人從古龍封安國公終延州觀察使贈保靜軍節度使同中書門下平章事楚國公諡惠恪從善內殿承制從贊崇班

孝宗堂弟伯玖秉義郎子彥子也伯玖生而聰慧年七歲同選入宮高宗命吳才人母之賜名據字潤夫除和州防禦使孝宗就傅獨居禁中改授節度使吳國公宰執趙鼎劉大中王庶持其議不欲與皇子並久之下紹興九年三月丁亥除保大軍節度使封崇國公尋詔赴善堂聽講十五年加檢校少保

進封恩平郡王出就外第與

年改武昌軍節度使二十二年子彥卒去官持服終喪還舊官

普安建儲名位遂定加恩稱

事置司紹興孝宗卽位特授

許入朝名宴內殿呼以官不

觀使淳熙中除少傅高宗崩

信王累贈太保太師子四人

灝師淪師路並武翼大夫孫

冊曰南北兩朝相為終

天未嘗廢吁嗟秀王昌

弘簡錄卷一百七十三

安官屬禮制相等號東西府踰

子姪遷開府儀同三司判大宗正

保靜江軍節度使時上友愛屢

賜予無算王累章乞間改禮身

赴得疾踰年薨年五十九追封

即淳歷忠州團練永州防禦使師

林保義郎

如繼世而興所由一理身雖不傳

永世

